

HERMANO FILIPE

MAROMAK BA ONA?

Missão Católica iha Laleia



PARÓQUIA DE LALEIA

HERMANO FILIPE

MAROMAK BA ONA?

Missão Católica iha Laleia

PARÓQUIA DE LALEIA

FICHA TÉCNICA

Autor: Frei Hermano Filipe de Jesus da Silva Rodrigues, *OFM Cap.*

Título: MAROMAK BA ONA?

Subtítulo: *Missão Católica iba Laleia*

Edição: Novembro de 2017

Paróquia de Nossa Senhora do Rosário

Laleia | Timor-Leste

hermano@capuchinhos.org | www.haufiar.com | www.laleia.org | www.facebook.com/paroquiadelaleia

ba *Isabel Gusmão*
ne'ebé “pseudocultura” oho

ba *frei Maxi* no
ba *frei Capuchinho sira* tomak

ba *Leigos Capuchinhos em Missão*

no liuliu ba *ema ain-tanan*
ne'ebé domingo-domingo
harii Jesus Cristo nia Kreda
no tahan paróquia Laleia nian.

Índice

INTRODUÇÃO	9
KREDA TIMOR IHA TEMPO MUDANÇA	9
IHA RAI DOBEN TIMOR EMA MESSAK CATÓLICO?	10
KREDA LA BELE FÓ FATIN BA RACISMO NO XENOFOBISMO	11
KREDA TIMOR, FATIN ESPERANÇA	11
PARÓQUIA LALEIA NIAN	12
HISTÓRIA BADAQ	12
MISSIONÁRIO SIRA	12
PÁROCO	12
ORDEM DOS FRADES MENORES CAPUCHINHOS.....	13
LEIGOS CAPUCHINHOS EM MISSÃO	13
IRMÃS FRANCISCANAS MISSIONÁRIAS DE NOSSA SENHORA	13
CONSELHOS PAROQUIAIS	13
CONSELHO PASTORAL PAROQUIAL	13
CONSELHO ECONÓMICO PAROQUIAL.....	14
Economato Paroquial.....	14
Apoio ba Desenvolvimento paróquia nian.....	14
Rai (propriedades)	14
Karau	14
Karreta	15
Uma ba Leigos Capuchinhos em Missão.....	15
Tanque bee.....	15
Dapur foun	15
IGREJA PAROQUIAL E CAPELAS	15
IGREJA DE NOSSA SENHORA DO ROSÁRIO (LALEIA)	15
Plano de Enquadramento Paisagístico	16
CAPELA DE NOSSA SENHORA AUXILIADORA (SAMALAI).....	16
CAPELA DE SÃO JOÃO DE BRITO (CAIRUI).....	16
CAPELA DE SÃO FRANCISCO DE ASSIS (HATUCARAU)	16
CAPELA DE SÃO BOAVENTURA (TURIAHA)	17
CAPELA DE SÃO PIO DE PIETRELCINA (RAIBU)	17
PASTORAL LITÚRGICA	18
CELEBRAÇÃO LITÚRGICA E SACRAMENTOS	18
SACRAMENTO DO BAPTISMO	18
SACRAMENTO DA EUCARISTIA.....	18
Missa de Requiem.....	18
SACRAMENTO DA RECONCILIAÇÃO (CONFESSA)	19
SACRAMENTO DA CONFIRMAÇÃO (CRISMA)	19
SACRAMENTO DA SANTA UNÇÃO (MINA SARANI)	19
GRUPOS DE APOIO À LITURGIA	19
ACÓLITOS	19

MINISTROS EXTRAORDINÁRIOS DA COMUNHÃO	19
LEITORES.....	20
GRUPOS CORAIS	20
Coro Paroquial	20
Coro Santa Clara	20
Coro Seluk	20
EQUIPA DE DECORAÇÃO.....	20
ADORAÇÃO DO SANTÍSSIMO SACRAMENTO	21
ORAÇÃO DE LAUDES	21
PASTORAL PROFÉTICA.....	22
CATEQUESE DA INFÂNCIA E ADOLESCÊNCIA.....	22
CORO DA CATEQUESE	22
FORMAÇÃO DE CATEQUISTAS.....	22
CATEQUESE DE ADULTOS	22
LABARIK SIRA NE'EBÉ TUIR CATEQUESE SIRA-NIA AMAN-INAN.....	22
PREPARAÇÃO BA BATISMO.....	22
PREPARAÇÃO BA SACRAMENTO KABEN	22
PASTORAL BÍBLICA	23
PASTORAL VOCACIONAL	23
GRUPOS E MOVIMENTOS	23
APOSTOLADO DA ORAÇÃO.....	23
RENOVAMENTO CARISMÁTICO CATÓLICO.....	23
JUVENTUDE FRANCISCANA.....	23
FOSCA	23
DEVOÇÃO SIRA.....	24
ORAÇÃO DO ROSÁRIO	24
SAGRADA FAMÍLIA.....	24
DALAN CRUZ NO DALAN NAROMAN	24
PASTORAL DA COMUNICAÇÃO SOCIAL	24
RÁDIO NA'Í FETO LALEIA	24
PÁGINA WEB	25
FACEBOOK.....	25
PASTORAL SOCIAL.....	26
FÓ LIMAN BA MALU	26
PASTORAL DA SAÚDE.....	26
PASTORAL DA CRIANÇA.....	26
CENTRO DA PASTORAL DA CRIANÇA.....	26
PASTORAL DO IDOSO.....	26
PASTORAL DA PESSOA COM DEFICIÊNCIA.....	26
PASTORAL DA EDUCAÇÃO.....	26
JARDIM DE INFÂNCIA «IRMÃO SOL».....	26
A.T.L.....	27
BIBLIOTECA «SÃO LOURENÇO DE BRINDES».....	27
CURSO DE MÚSICA.....	27
CURSO DE LÍNGUA PORTUGUESA.....	27
CURSO DE ALFABETIZAÇÃO	27

PASTORAL DA CULTURA	27
CENTRO DE SÃO FRANCISCO DE ASSIS	27
CENTRO DE SANTA CLARA DE ASSIS.....	28
CARPINTARIA SOCIAL.....	28
PASTORAL DA ECOLOGIA.....	29
LIMPEZA HALE’U UMA-KREDA NO CAPELAS.....	29
LUTA HASSORU TABACO.....	29
LAUDATO SI’.....	29
AGRICULTURA	29
CARTÓRIO PAROQUIAL	30
INTRODUÇÃO.....	30
DECLARAÇÕES E CERTIDÕES	30
CERTIDÃO DE BATISMO.....	31
CERTIDÃO DE CASAMENTO.....	31
CERTIDÃO DE ÓBITO	31
ASSENTOS BATISMO NO CASAMENTO HUSSI LIVRO MANUTUTO NIAN.....	32
DIGITALIZAÇÃO DE DOCUMENTOS	32
BASE DE DADOS	32
CONCLUSÃO.....	34

INTRODUÇÃO

Iha loron sia, fulan novembro, tinan 2014, paróquia Laleia hala’o procissão to’o baliza ho Manatuto atu entrega ba paróquia ne’ebá *Cruz Jovem no N^a S^a Peregrina* nia ilas. Ema Laleia, Samalai no Cairui ne’ebé acompanha procissão, balu tanis, balu hakilar, dehan: “Maromak ba ona”, “Maromak ba ona”, “adeus”, “adeus”, “adeus”. Ha’u sente tristeza kle’an hanessan lalehan monu tun iha ha’u-nia ulun, tanba se povo fiar duni katak “Maromak ba ona” então Kreda nia hanorin iha tinan atus lima nia laran to’o iha ne’ebé? Ka iha tinan atus lima nia laran povo simu de’it hussi Igreja Católica buat ne’ebé superficial maibé la simu duni Kreda nia Fiar? No ha’u sei hela iha paróquia ne’e atu halo saída? Buka *batudu ba sarani sira katak Maromak la bussik ita maibé nafatin hamutuk ho ita*, hanessan Moisés hanorin ba nia povo (haree Ex 17,1-7), *sai ha’u-nia knaar dabuluk nu’udar pároco*.

Oras ne’e, ne’ebé bessik atu entrega responsabilidade Paróquia Laleia nian ba amo-lulik seluk, ha’u iha obrigação atu buka halo síntese kona-ba realidade eclesial paróquia nian atu pároco foun bele hatene saída mak ita halo iha tinan ikus sira ne’e, dificuldades no desafios ne’ebé ita hassoru, no, importante liu, bele facilita nia serviço hodi prepara, hamutuk ho *Conselho Pastoral Paroquial*, programa paróquia nian ba tinan pastoral foun.

Loos duni katak *relatório* ida-ne’e iha interesse liuliu ba *Cúria Diocesana* no ba sarani paróquia Laleia, maibé ha’u hanoin atu publica mós iha *internet* atu, dada hussi realidade específica ida, mak paróquia Laleia, amo-lulik sira seluk, madres no sarani tomak ne’ebé hakarak hola parte iha Kreda nia hafoun an, iha tempo ida-ne’e ne’ebé sociedade Timor hassoru problemas foun oioin, bele hala’o nafatin reflexão kona-ba oinsá mudanças sociais hirak ne’e sai desafio boot ba *pastoral*, ba *moral* no *fiar* sarani iha *Terra de Santa Cruz e de Santa Maria*. Loos tebes katak realidade pastoral iha *sukaer-laran* – região Manatuto, Lacló, Vemasse no Laleia – la hanessan região sira seluk, tanba ema nia *cultura* no *características antropológicas* la hanessan *makassae*, *mambae* ka *baikenu* oan sira nian, maibé fiar ida de’it, Kreda ida de’it no ita bele hetan nafatin elementos balu iha realidade pastoral específica ida ne’ebé hanessan iha fatin hotu-hotu iha Timor laran tomak.

Temas ne’ebé trata iha *relatório* ida-ne’e, tanba kona assunto ida-idak superficialmente, sai iha tempo hanessan convite atu *agentes da pastoral* bele hakle’an sira ho estudos seluk, hanessan amo-bispo sira halo iha livro “*Mai Haré Timor: Reflexão Bispo Timor-Leste sira nian kona-ba realidade Timor-Leste tuir naroman Evangelho, iha biban tinan atus lima Missão nian*”, no ha’u rassik buka halo daudaun iha blog www.haufiar.com.

Iha tinan ruma nia laran, *Pastoral ba Ema ho Deficiência* fó biban mai ha’u atu visita fatin barak no hatene ema barak iha diocese Baucau. Tan ne’e, maski atu simu daudaun knaar foun iha rai Portugal, Timor-Leste no Timor oan sira sei hela nafatin iha ha’u-nia fuan no oração tanba iha tinan hirak ne’e nia laran ha’u conhece katuas no ferik sira ho histórias nakonu ho sofrimento maibé ho buat barak atu hanorin ba geração foun, ha’u conhece foin-sa’e sira barak ne’ebé tane ideal cristão aas tebetebes, ha’u conhece inan-aman barak ne’ebé hakarak duni hakle’an fiar sarani iha sira-nia moris loron-loron nian no ha’u acompanha labarik sira barak ne’ebé sei sai Timor-Leste nia futuro.

Ne’e duni, maski dificuldades ne’ebé ha’u hassoru nu’udar pároco iha Laleia iha bessik tinan lima nia laran, ha’u bele dehan ho neon ho laran tomak katak experiência ida-ne’e hariku tebetebes ha’u-nia moris nu’udar religioso no amo-lulik, tan ne’e, fó sai ba público *relatório* kona-ba realidade paróquia Laleia nian sai, iha tempo hanessan, oportunidade atu agradece ba sira hotu ne’ebé iha tinan ikus sira ne’e tulun ha’u iha ha’u-nia knaar nu’udar bibi-atan paróquia Laleia nian.

Kreda Timor iha Tempo Mudança

Sociedade Timor ohin loron nian la hanessan ida ne’ebé ha’u conhece tinan sanulu-ressin-haat liubá. Iha mudanças barak ne’ebé ita reconhece positivas, liuliu desenvolvimento infraestruturas ne’ebé

hala'o daudaun. Maibé ema nia moris la depende de'it hussi estradas no pontes, depende uluknanain hussi buat ne'ebé fó segurança no dignidade ba ema nia moris loron-loron nian hanessan hahán, saúde no educação.

Uma-kreda hanorin katak di'ak liu ita ko'alia fali kona-ba *desenvolvimento integral*, ne'ebé haree la'ós de'it ba aspeto *material*, maibé mós ba aspeto *espiritual* no *moral*. Iha aspeto hirak ne'e, Kreda sente katak dala barak ita la'o fali ba kotuk ho problemas ne'ebé buras daudaun hanessan: álcool, jogo, corrupção, halai ba *matan-dook*, adultério (selingkuh), incesto (sala hamoe raan), violência doméstica, violência sexual, aborto, moris iha bossok nia laran (ita koko loron-loron katak ko'alia ema nia vida, murmura, inventa no bossok sai buat baibain ba ema barak tanba ema lakon daudaun consciência kona-bá sala), halo *estilo*, halo *buan*, fiar saugati ba seitas, prostituição, tráfico humano, pedofilia, droga, nst.

Ita hakarak karik ko'alia kona ba aspeto *material*, desenvolvimento ohin loron nian mós lori problemas balu hanessan: desigualdade entre cidade ho meios rurais, desemprego, impacto hussi lala'ok ema nian iha meio-ambiente, nst. Kona-ba buat sira ne'e hotu ha'u recomenda ema atu lê ho atenção amo-bispo sira nia reflexão iha livro "*Mai Haré Timor*".

Desenvolvimento mós lori problema foun ida mak lori ema balu kahur Igreja ho Estado. Loos duni katak Kreda Timor ho nação nia na'i-ulun sira serviço ho neon ida de'it maibé knaar oin rua ketaketak. Dala ruma, autoridades comunitárias no "intelectuais" balu, hanoin katak sira mak ukun paróquias no pároco sira tem que halo tuir. Sira haluha katak bainhira *líder comunitário* ka *funcionário público* "hatama kanuru" saugati iha programa pastoral paróquia nian bele cria problema institucional complexo entre Estado ho Kreda. Iha Laleia ha'u dehan beibeik katak «*Kreda instituição ida ho princípios doutriniais no morais universais, ne'e duni la bele dança tuir ema ida-idak nia música*». Buat sira ne'e hotu mossu tanba:

«[...] ita-nia fiar abut la metin, namlele no balai tun-sa'e, ka fiar tuir hakarak de'it. Ita seidauk metin iha Jesus, iha Jesus Cristo ninia Kreda.» (Mai Haré Timor, nº 195)

Iha rai doben Timor ema messak Católico?

Iha loron neen, fulan novembro, tinan 2014, tuir programa pastoral, kalan ami celebra Eucaristia no hafoin atu halo Adoração ba *Santíssimo Sacramento*, maibé ema balu iha programa seluk; sira fila kotuk ba *Santíssimo Sacramento* ne'ebé exposto iha Altar leten no haruka sarani sira lori bee, lilin no mina ruma atu halulik iha *Cruz Jovem* nia oin. Bainhira ha'u, tanba ha'u-nia obrigação, dehan katak programa mak ne'e Adoração ba *Santíssimo Sacramento* tanba ba ema sarani la iha buat santo no lulik liu fali do que ida-ne'e, sarani atus ba atus *runguranga* no chefe de suco ida hakilar ho lian maka'as ninia ignorância religiosa tomak: «*Maromak la mai tanba amo-pároco, mai tanba ita sarani*». Hanoin katak adora cruz no ilas ida importante liu fali do que adora Maromak loloos iha Eucaristia hatudu katak dalan atu haloos ema nia fiar tuir Kreda nia hanorin sei naruk tebetebes.

Tebes duni, ita haree katak maski 97% ema Timor simu batismo, realidade ne'ebé ita koko loron-loron mak catolicismo mossu nu'udar matan de'it ba sanan ne'ebé animista. Ita bele hatutan katak maioria, bainhira hanoin Maromak, hanoin de'it ba procissões, adora santo sira nia ilas (hodi fó razão ba maluk protestante sira), sunu lilin no reza terço. Maioria la participa iha sacramentos ka iha liturgia dominical, mossu de'it iha loron Páscoa, Natal no Padroeira no comunga nafatin, maski la confessa ka la iha intenção atu hakribit sala. No Kreda Timor tem que hola decisão difícil: haksolok ho número (97%) ka haksolok no forma didi'ak minoria ne'ebé domingo-domingo harii Jesus Cristo nia Kreda iha paróquia-paróquia!?

Exemplo balu kona-ba fiar ne'ebé la loos no tem que hetan atenção hussi Uma-kreda:

- a) Dala ida ha'u hussu ba katuas lia-na'in ida: ita-boot fiar Maromak? Nia hatán ho pronto: «ha'u fiar!» Hafoin ha'u hussu, ita-boot fiar saída kona-ba Maromak? Nia hatán: «ha'u fiar katak Maromak iha kbiit hanessan matebian sira!»

- b) Dala ida ha'u hetan tahu baluk ida bessik santo ida nia ilas, ha'u hussu ba ferik-sira ne'e katak sá? Sira hatán: «ema mai tau iha ne'e atu hussu ba santo atu halo aat ba funu balu sira nia natar».
- c) Dala ida, hafoin ami haruka tiha halo santo ida nia ilas foun atu tau iha capela tanba ida tuan aat la halimar, *intelectual* ida mai hateten mai ha'u katak kalan santo mossu ba nia no hussu tansá mak ida foun ocupa fila fali nia fatin?
- d) Dala ida, iha loron festa padroeira, ha'u ba reza iha sacrário nia oin no hetan *intelectual* balu ne'ebé serviço iha Díli lori sira-nia bikan ba han iha ne'ebá no ko'alia halimar hanessan iha *warung*.
- e) Foin lalais, iha tempo eleição 2017, ita rona iha televisão político ida, ne'ebé ba hala'o campanha iha região Oe-Cusse, dehan: «povo mak fó fiar mai ami karik, ami sei tau bispo especial ida iha Oe-Cusse».

Buat sira hanessan ne'e mossu loron-loron no sai desafio boot tanba ema hanaran an sarani tanba simu tiha ona baptismo maibé hahalok la han malu ho fiar sarani loloos. Kreda tem que brani atu clarifica Kreda nia hanorin no forma didi'ak nia ema sarani.

Kreda la bele fó fatin ba racismo no xenofobismo

Ocupação rai doben Timor, primeiro hussi ema Portugal no hafoin hussi ema Indonésia, bele explica sentimento racista no xenóforo balu, maibé la bele explica buat hotu ne'ebé mossu daudaun, liuliu iha perspectiva cristã. Amo Yosek ema dehan bapa, Amo Adelino, ema dehan amo Timor maibé hela kleur iha rai liur, amo Fernando, amo Filipe no missionário/a sira oras-ne'e daudaun messak ema malae: balu malae-metan, balu malae-mutin, maibé sira hotu malae. Ema ain-tanan la halo diferença; ba sira, ami mak sira-nia bibi-atan sira, ne'ebé sira simu ho domin no liman nakloke. Maibé “intelectual” balu, dada la'ós hussi sentimento cristão maibé hussi forma ida “nacionalismo desintegrador”, koko beibeik atu sobu paróquia Laleia hodi hafahe sarani-sira. Sira buka buat ida de'it: poder (ukun)!

Ne'e duni ita tem que hussik claro katak: 1) ohin loron, ema ne'ebé hanehan povo Timor la'ós ona nem malae-mutin nem malae-metan, maibé timoroan-sira rassik mak hanehan malu; 2) ema ne'ebé iha sentimento racista ka xenóforo la moris iha comunhão ho Maromak (haree Mt 5,23-24).

Kreda Timor, fatin Esperança

Maski problemas fiar nian, litúrgicos, sacramentais, no seluk tan ne'ebé mossu beibeik, ita bele dehan katak povo Timor religioso tebetebes no bainhira diocese sira haka'as an atu oferece oportunidades formação cristã, sarani sira sei aproveita, sei buras iha fiar loloos no fiar ida-ne'e sei nabilan liután nu'udar fator identitário povo Timor-Leste ninian no, importante liu, sei sai duni instrumento salvação nian ba ema Timor.

Maibé ita la bele haluha katak importante liu do que “doutrina” mak padres, madres no sarani tomak bele sassin Jesus nia Evangelho. Sassin ne'e mak dada ema seluk atu hakarak moris koko Maromak nia kmanek no halo “experiência pessoal de encontro com Jesus”.

PARÓQUIA LALEIA NIAN

História badak

Iha tinan barak nia laran, *Estação Missionária de Laleia* sadere an ba *Paróquia Manatuto*. Missionário sira hela iha ne'ebá no tinan ida dala rua ka dala tolu mak mai visita Laleia no Cairui hodi celebra Eucaristia no sacramento sira seluk hanessian Casamentos, Batismos, fó Primeira Comunhão no fó Confessa. Iha tempo ne'ebé amo *Agostinho da Costa*, amo *Mariano Soares* no amo *Domingos da Cunba* sai pároco Manatuto, mak sira hahú visita beibeik *Estação Missionária de Laleia*.

Bainhira Timor-Leste ukun rassik an ona, amo-bispo tau iha Laleia, nu'udar pastor próprio, amo *Yosep Amandus Fabik* no hafoin amo *Adelino Leitão Ximenes Lopes* no Laleia hamriik ona nu'udar *Quase-Paróquia*. Maibé amo-lulik na'in rua ne'e la hela kleur iha Laleia no iha tinan 2003 *Dom Basílio do Nascimento* saran cuidado pastoral *Quase-Paróquia Laleia* nian ba *frei Capuchinho sira*.

Iha de'it tinan rua nia laran, ho dinamismo pastoral foun ne'ebé *frei Capuchinho sira* lori, Laleia sai *Paróquia*, ho *Nossa Senhora do Rosário* nu'udar mahein. *Ereção Canónica* hala'o iha loron ualu, fulan outubro, tinan 2005 no *frei Fernando Alberto Pedrosa Cabecinhas*, hussi *Ordem dos Frades Menores Capuchinhos*, mak sai pároco dahuluk.

Iha tinan 2012, *frei Hermano Filipe de Jesus da Silva Rodrigues*, hussi ordem religiosa hanessian, sai pároco daruak. Hamutuk ho *Conselho Pastoral Paroquial*, *frei Capuchinho sira* no *Leigos Capuchinhos em Missão*, iha comunhão ho programa pastoral Diocese Baucau nian, nia buka hola *visão de conjunto* kona-ba *Pastoral Litúrgica*, *Pastoral Profética* no *Pastoral Social* no define prioridades ba paróquia.

Missionário sira

Hussi tempo uluk to'o ohin loron, missionário sira barak mak serve sarani Laleia. Maski dala ruma, liuliu iha tempo ocupação, ema balu buka impede amo-sira nia lala'ok tanba de'it política, em geral, povo hadomi tebetebes missionário sira no reconhece katak iha tempo ocupação no ohin loron Kreda bessik nafatin povo Timor, liuliu ema kbiit-laek. Iha ne'e ha'u hakarak temi ho fuan agradece missionário/a sira ne'ebé ha'u hatene no serviço hamutuk ho ha'u: *madres brasileiras* hussi projeto "Pastoral da Criança", ne'ebé serviço iha Laleia hussi tinan 2000 to'o 2010, *frei Capuchinho sira*, *Leigos Capuchinhos em Missão* no *Irmãs Franciscanas Missionárias de Nossa Senhora*.

Pároco

Frei Hermano Filipe de Jesus da Silva Rodrigues moris iha rai Porto, Portugal, iha loron 16/04/1977. Halo *votos temporários* iha *Ordem dos Frades Menores Capuchinhos* iha loron 31/08/2003 no *votos perpétuos* iha loron 09/09/2007. Ordena tiha nu'udar amo-diácono iha loron 30/06/2009 no amo-lulik iha loron 15/08/2010. Serviço iha Laleia iha tinan 2003/2004 no iha Díli iha tinan 2006/2007. Iha tinan 2010 nia rohan nia sai ecónomo Fraternidade Laleia *frei Capuchinho sira* nian no Vigário-Paroquial iha Paróquia Laleia. Iha tinan 2010/2011 sai professor iha *Seminário Maior São Pedro e São Paulo* iha Fatumeta, Díli, no Assistente Diocesano ba *Pastoral ba Ema ho Deficiência*, iha Baucau. No hussi 2012 nia rohan to'o oras ne'e sai Guardiã no Ecónomo Fraternidade Laleia *frei Capuchinho sira* nian, Pároco Laleia, *Delegado Provincial OFMCap.* ba Timor-Leste, Secretário *Conselho Pastoral Diocesano*, membro *Conselho Presbiteral* no Assistente *Leigos Capuchinhos em Missão*. Iha tempo hanessian, sai confessor ba *Irmãs Franciscanas de Nossa Senhora das Vitórias* (Aubaca no Vila Nova), *Irmãs Concepcionistas ao Serviço dos Pobres* (Vemasse), *Diretor Espiritual* irmãs *Noviças Concepcionistas ao Serviço dos Pobres* (Tíbar) no fó apoio, tuir disponibilidade ne'ebé iha, ba *Irmãs Franciscanas Missionárias de Nossa Senhora* (Laleia). Oras ne'e daudaun prepara atu muda ba fraternidade Barcelos, iha rai Portugal, atu sai capelão iha *Hospital Santa Maria Maior*, capelão da *Misericórdia*, diretor *revista Bíblica*, diretor espiritual formando sira nian no coordenador *Comissão Comunicações Sociais frei Capuchinho sira* nian.

Ordem dos Frades Menores Capuchinhos

Frei Capuchinho sira to'o tiha iha rai Timor-Leste iha tinan 2003 tanba *Dom Basílio do Nascimento* nia convite atu ami tau matan ba *Quase-Paróquia Laleia* nian. Frei sira ne'ebé hela tempo ruma iha Laleia mak *frei Fernando Alberto, frei José Luís, frei Hermano Filipe, frei Clemente Martins, frei Manuel Rito, frei António Pojeira, frei Maximilian Kim Song, frei Mikael Denko* no *frei Yohannes Hamdi*. Hussi tinan 2003 to'o agora, fraternidade *frei Capuchinho sira* nian iha Laleia mós sura ho jovem mane barak ne'ebé mai koko sira-nia vocação, postulantes, noviços no pós-noviços. Sira ne'e mak kaer serviço barak iha paróquia hanessian catequese iha Samalai no Cairui, prepara sassán ba Missa iha igreja paroquial, kuda no rega ai-funan, halo to'os, nst. No importante liu, sarani sira hatene katak iha capela convento nian, frei sira harohan dadeer, meio-dia, loraik no kalan hodi hanoin mós povo Laleia tomak nia di'ak. *Frei Capuchinho sira* mós iha Fraternidade ida iha Tíbar, iha diocese Maliana nian.

Leigos Capuchinhos em Missão

Leigos Capuchinhos em Missão (LCM) mak movimento missionário leigo sira nian ne'ebé buka moris tuir espiritualidade capuchinha no aprova tiha hussi Ministro Provincial frei Capuchinho sira nian iha tinan 2011. Iha tempo ne'ebá, programa ida-ne'e hanoin uluknanain atu aplica iha Laleia, hafoin apresenta tiha nia ba Dom Basílio do Nascimento, maibé aban bainrua bele aplica mós iha fatin ka nação seluk. Leigos ne'ebé hela iha Laleia tinan ida mak *Celina Fernandes, Rafael Rito, Rosa Ribeiro, Luís Silva* no *Sandrina Silva. Joana Ribeiro* no *Berni Sullivan* serviço iha Laleia iha tinan tolu ressin nia laran. Buat barak ne'ebé ko'alia iha relatório ida-ne'e bele realiza tanba LCM sira-nia serviço maka'as. Loron-loron, ho espírito evangélico, sira sassin domin ba'in ba Maromak no ba maun alin sira, liuliu ema kiak no mukit sira. Mós iha leigo balu ne'ebé serviço iha Laleia iha projeto específico ruma pelo menos fulan ida mak: *Olinda Ribeiro, Paulina Ribeiro, Ernestina Falcão, Ana Rodrigues, Pedro Cardoso, Ana Patrícia, Ana Margarida* no *Andreia Fernandes*.

Irmãs Franciscanas Missionárias de Nossa Senhora

Irmãs *Franciscanas Missionárias de Nossa Senhora* (FMNS) hahú sira-nia missão iha Laleia iha fulan fevereiro, tinan 2014. Iha loron 26/12/2012, Pároco, iha coordenação ho bispo Baucau, convida sira-nia congregação atu mai serviço iha Laleia, liuliu atu kaer *Jardim de Infância «Irmão Sob»* nu'udar sira-nia projeto rassik, tulun iha *Pastoral ba Ema ho Deficiência* (bainhira sira to'o iha Laleia pároco la'ós ona coordenador diocesano), no liuliu iha buat ne'ebé próprio hussi sira-nia carisma, ne'ebé tama ba dala uluk iha rai Timor hodi hariku liután Kreda diocesana. Sira dedica tempo barak ba oração, vida fraterna, visita ema moras no otas boot, no ba educação liu hussi *Jardim de Infância* no *A.T.L.*

Conselhos Paroquiais

Conselhos Paroquiais sira-nia knaar mak tulun pároco prepara no hala'o programa pastoral no gere sassán paróquia nian. Iha ema barak ne'ebé uluk toman confia buat hotu ba *comissões organizadoras* tanba la compreende Kreda nia lala'ok no organização paróquia sira nian tuir *Direito Canónico* no dala barak *comissões organizadoras* hirak ne'e sai fali escândalo ba comunidade sarani. Oinsá ema ne'ebé la ativo iha comunidade sarani bele organiza festa religiosa ida? Iha tinan 2015 *comissão organizadora* ba festa padroeira gasta 5.267 usd; iha tinan 2016 *comissão organizadora*, tanba hala'o sira-nia knaar ho transparência no lia loos, gasta de'it 3.325. Iha tinan 2017 *comissão organizadora* (hussi suco hanessian ida ne'ebé organiza iha tinan 2015) seidauk apresenta contabilidade maibé dehan tiha ona katak ossan ressin la iha. Ema matenek compreende kedas katak buat ruma la loos ho *comissão organizadora* 2015 no 2017 no ida-ne'e hamoe Uma-kreda tomak ne'ebé iha comunhão ho Amo-Papa Francisco buka harii «Kreda ida-ne'ebé kiak atu serve ema kiak». Dalan mak ida ne'ebé Kreda propõe: *Conselhos Paroquiais*.

Conselho Pastoral Paroquial

Conselho Pastoral Paroquial (CPP), ne'ebé preside hussi Pároco (cánon 536 § 1), mak organismo ne'ebé, iha comunhão ho Kreda diocesana, anima comunidade sarani (paróquia) nia moris no buka usa didi'ak membro sira nia dons no carismas ba paróquia tomak nia di'ak. Iha tinan hirak ne'e nia laran, membros *Conselho Pastoral* balu nunca falta no hatudu duni interesse atu tulun pároco atu hanoin, hala'o no

avalia programa pastoral; balu fali la mossu tanba seidauk comprende importância Conselho ida-ne'e nian.

Conselho Económico Paroquial

Conselho Económico Paroquial (CEP) mak conselho ne'ebé fó hanoin ba pároco kona-ba gestão sassán, ossan, rai, obras no património tomak paróquia nian. Oras ne'e daudaun composto de'it hussi pároco, superiora FMNS, coordenadora LCM no Ecónoma Paroquial. Sira seluk (ex liurai balu) ami hassai tiha ona tanba sira-nia hahalok empata fali paróquia nia buras. Pároco foun tem que hili ema ruma atu tulun nia, la'ós tuir "cultura", maibé ema ne'ebé hadomi duni Uma-kreda.

Economato Paroquial

Ecónoma paroquial – D^a Ana Maria – mak responsável atu hatama loron-loron iha computador *movimentos de caixa* no iha fulan nia rohan tuur hamutuk ho pároco atu haree se buat hotu loos ka lae. Fulan-fulan nia lori ba economato diocesano contabilidade paróquia nian. Nia mós prepara recibos no buat hotu ne'ebé tem que apresenta bainhira diocese mossu atu halo inspeção ba contas paróquia nian. Pároco mantém nia confiança tomak iha Ecónoma paroquial tanba nia hala'o nafatin nia serviço ho seriedade, compromisso, profissionalismo no hodi hatudu domin boot ba Uma-kreda. Iha loron 31/10/2017, *fundo paroquial* sura ho 40.405,90 usd.

Apoio ba Desenvolvimento paróquia nian

Hodi hanoin tebes sarani sira nia di'ak iha aspeto hotu-hotu, além do serviço pastoral ne'ebé prioritário, missionário sira mós haka'as an atu desenvolve infraestruturas paróquia nian. No iha ne'e bainhira temi "missionário sira" hanoin liuliu *frei Capuchinbo sira* no *Leigos Capuchinhos em Missão* ne'ebé fahe visão hanessan kona-ba compromisso missionário. Iha buat barak ne'ebé ita harii no halo iha tinan ikus sira ne'e, ne'ebé la usa ossan hussi fundo paroquial, maibé *frei Capuchinbo sira* no *Leigos Capuchinhos em Missão* mak buka doador sira no ossan atu tulun paróquia. Oras ne'e, neineik-neineik, sarani sira rassik mak tem que buka contribui ba paróquia nia necessidades no desenvolvimento.

Rai (propriedades)

Paróquia iha rai oiain:

- Igreja no rai hale'u Igreja Laleia (14.492 m²).
- Gruta N^a S^a Lurdes (2.774 m²). Seidauk hadi'a lutu tanba hein governo atu haluan estrada.
- Edifício Carpintaria no rai (14.465 m²). Ema ocupa fali rai iha sorin-sorin, ne'e duni importante, bainhira bele karik, halo lutu hale'u rai ida-ne'e.
- Casa das Madres no rai hale'u uma (712,5 m²).
- Natar iha Laleia (10.355 m²). Estado hala'o expropriação ba rai ida-ne'e hodi selu 20.400,00 usd ba paróquia. Hussi rai tomak ida-ne'e hela uitoan de'it.
- Rai iha Wé-Noren (bessik hectare haat).
- Rai iha Beboro (3.854 m²). Rai ida-ne'e fahe ba rua tanba estrada liu hussi klaran.
- Natar iha Cairui. Tinan barak liubá ema ne'ebé uluk fó natar ba Missão foti fila fali tanba dehan ex catequista ne'ebé responsável atu tau matan ba natar serviço la loos.
- Capela no rai iha Hatucarau (1.872 m²).
- Capela no rai iha Samalai (iha levantamento topográfico).
- Capela iha Turiaha.
- Capela iha Raibu.
- Capela iha Cairui. Uluk iha 2.000 m², maibé ema halo uma hodi ocupa rai Missão nian. Hafoin, rai na'in ida, fó rai barak ba Missão no oras ne'e daudaun iha bessik 10.000 m².

Karau

Uluk Missão Católica iha karau barak no oras ne'e daudaun ema sei temi nafatin karau missão nian. Iha tempo ne'ebé Amo *Agostinho da Costa* mak pároco iha Manatuto, nia oferece karau balun ba *Estação Missionária de Laleia* no ba *Estação Missionária de Cairui* atu catequista sira bele halai natar missão nian

nomos bele hetan rendimento ba Estação Missionária sira nia necessidades. Iha tinan 2013, bainhira fó reforma ba catequista Cairui, hafoin nia serviço ba Uma-kreda iha tinan tolunulu nia laran, nia lori “ba nia uma” sassán Missão nian hanessian karau no trator. Iha Laleia, tuir surat ne’ebé catequista rassik mak assina, iha tinan 2012, missão iha 28 “cabeças”, no iha tinan 2013, tun ba 22 “cabeças”. Iha tinan 2016, tanba ha’u lakohi fó ulun moras ba pároco tuir mai, ha’u exige katak missão tem que fa’an karau balun tanba iha tinan tolunulu nia laran nunca hetan rendimento. Ami fa’an tiha karau haat catequista dehan katak hela haat tan, katak $22-4=4$? Ema ida la bele fiar matemática ida-ne’e! Iha Cairui no Laleia ami koko atu resolve problema ida-ne’e ho di’ak tanba ami reconhece katak ema hirak ne’e iha tempo ocupação mós terus hotu no defende Uma-kreda, maibé iha tempo ukun rassik an, ho hahalok hanessian ne’e, sira halo fali Uma-kreda sente moe.

Karreta

Missionário sira oferece ba paróquia, ba pároco no missionário sira nia uso, carreta ida ho marca Nissan, ho folin 20.500,00 usd. Uluk ami usa de’it frei sira nia carreta. Atu hola carreta ida-ne’e la usa ossan hussi fundo paroquial maibé *frei Capuchinho sira* no *Leigos Capuchinhos em Missão* mak oferece ba paróquia.

Uma ba Leigos Capuchinhos em Missão

Iha tinan 2013, nu’udar preparação atu simu madre-sira (FMNS) iha Laleia no prepara uma bessik *Centro de Saúde* ba sira atu hela, missionário sira, tanba harii tiha ona *Centro São Francisco de Assis* ne’ebé iha salão ida atu celebra Missa iha liur, hamutuk ho *Conselho Económico* iha tempo ne’ebá, decide atu hadi’a salão tuan ne’ebé monu daudaun no halo uma ba *Leigos Capuchinhos em Missão* (LCM) atu hela. Iha uma ida-ne’e mós simu beibeik bainaka sira ne’ebé mai visita ka tulun paróquia. Uma ida-ne’e iha quarto tolu ho capacidade ba ema na’in ualu, hariis fatin rua, capela oan ida no dapur. Atu harii uma ida-ne’e la usa ossan hussi fundo paroquial maibé *frei Capuchinho sira* no *Leigos Capuchinhos em Missão* mak oferece ba paróquia, hamutuk 30.115,50 usd.

Tanque bee

Iha tinan 2015, tanba dificuldade ne’ebé iha beibeik atu halibur bee ne’ebé precisa ba Missão nia necessidades (Igreja, Jardim de Infância, Centro da Pastoral da Criança, Convento, LCM nia uma, hamoos CESFA), missionário sira (*frei Capuchinho sira* no *Leigos Capuchinhos em Missão*) harii tanque boot ida, ho capacidade 40.000 l, no gasta 11.258,12 usd ho ida-ne’e. Dala ida tan la usa ossan paróquia nian.

Dapur foun

Belun ida hussi rai Austrália oferece atu harii dapur foun ida ba paróquia maibé tanba nia serviço barak seidak iha tempo atu mai remata. Ita hein katak sei bele remata iha tinan 2018 nia laran. La usa ossan hussi fundo paroquial.

Igreja Paroquial e Capelas

Igreja de Nossa Senhora do Rosário (Laleia)

Ema barak hateten katak igreja Laleia mak kreda furak liu iha Timor laran tomak. Ha’u mós sente ligação afetiva maka’as ho igreja ida-ne’e. Iha loran 19, fulan novembro, tinan 2013, ita celebra tinan ualunulu dedicação Igreja Laleia nian. Nu’udar preparação, ha’u hussu Estado nia tulun atu reabilita igreja no fahe intervenção ba fase rua. Iha fase dahuluk, pica reboco tuan no halo reboco foun, bolu “reboco projetado”. Fase daruak (hadi’ak kakuluk no eletricidade) seidak hala’o no hein nafatin Estado nia tulun nu’udar promete tiha iha loran 15/11/2013 liu hussi *Agência de Apoio ao Desenvolvimento*.

Iha biban ida-ne’e, ha’u halo acordo ho *Centro de Conservação e Restauro da Universidade Católica Portuguesa* atu haruka técnico na’in rua atu hamoos no halo restauro ba Na’i Feto no Santo António de Lisboa sira nia ilas, Sagrado Coração de Jesus no Cristo Crucificado. Santa Teresinha nia ilas la bele halo restauro tanba uluk Laleia oan ida lori ba Díli atu pinta ho tinta ne’ebé usa ba portão no estraga ninia

pintura original. Ho povo sarani tomak nia apoio, mós hameno hussi rai Portugal sino foun no halo medalha no terço ho ossan mutin atu oferece ba bainaka sira nu'udar recordação ba celebração ida-ne'e.

Kreda Laleia nia história badak ha'u hakerek tiha ona hodi baseia ba fontes ne'ebé iha, liuliu relatório hussi amo-lulik sira ne'ebé uluk amo-bispo Macau haruka atu visita Missão iha Timor (uluk Goa, Timor no Macau forma Província Eclesiástica ida de'it). Ha'u sei haka'as an atu publica história badak ida-ne'e iha tinan 2018, bainhira ita sei celebra tinan ualunulu-ressin-lima dedicação Kreda Laleia.

Plano de Enquadramento Paisagístico

Iha tinan 2013, sarani balu hussu ba pároco atu hadi'a lutu hale'u Igreja Laleia. Pároco hussu Arquitecto Paisagista ida ne'ebé visita Laleia, nia tulun atu prepara *Plano Geral de Enquadramento Paisagístico*. Iha tinan 2014 nia rohan, pároco hala'o socialização iha bairro-bairro, tuur hamutuk ho sarani sira, no explica katak projeto ida-ne'e la'ós de'it atu hadi'a lutu ne'ebé iha maibé atu harii lutu foun (dada 20 metros ba oin) no atu hanoin mós pormenor ida-idak kona-ba ligação harmónica entre Igreja, Convento, CESFA, Jardins, Rádio, Salas de Catequese, Jardim de Infância, nst. Iha tempo ne'ebá ema hotu-hotu haksolok hodi haree projeto ida-ne'e; ikus mai, bainhira hahú implementa mak mossu “intelectual” balu ne'ebé nunca harii buat ida no iha de'it capacidade atu sobu, atu empata projeto. Pároco foun tem que hatene katak ema arquitecto no ema ne'ebé “curso iha sukaer-laran” capacidade la hanessan atu compreende buat sira ne'e no ita tem que lori buat hotu ho paciência maibé ho certeza katak ita halo buat hotu ho bispo nia aprovação no ita hatene saída mak importante ba paróquia nia buras, no la'ós ema idarua nia hanoin lotuk mak bele empata paróquia tomak.

Capela de Nossa Senhora Auxiliadora (Samalai)

Capela oan ne'ebé usa daudaun hahú harii iha fulan janeiro 2013 no “dedica” iha fulan maio 2013. Capela tuan, ne'ebé harii ho material local, furak tebetebes maibé tanba la iha manutenção ne'ebé di'ak udan tama no sobu daudaun. Sarani balu hola iniciativa atu hahú harii ida foun no ladún iha coordenação ho pároco ne'ebé iha momento ne'ebá ba Portugal trata saúde; iha coordenação di'ak karik, então capela foun halo oin seluk, hodi obedece liután ba regras litúrgicas. Maibé importante liu mak reconhece no valoriza sarani sira nia iniciativa. Paróquia tulun ho ossan uitoan atu remata. Iha projeto ida atu harii capela foun ida (iha capela ne'e no CESCA nia oin), ne'ebé hahú desenvolve iha tinan 2014 ho equipa arquitectos hussi Braga, maibé oras ne'e importante liu mak dedica atenção ba questões pastorais no hussik construção capela foun ba tempo seluk.

Capela de São João de Brito (Cairui)

Dedicação capela foun Cairui nian hala'o iha loran 24, fulan maio, tinan 2016, iha celebração ida ne'ebé preside hussi Dom Basílio do Nascimento, maibé hahú harii iha tinan 2015 (hafoin preparação projeto iha tinan rua nia laran) hodi hanoin tinan atus lima missãoção iha rai Timor. Capela foun harii tanba ida tuan la iha condição atu celebra mistérios fiar nian ho dignidade. Hussi rai Portugal, oras ne'e daudaun, ha'u prepara equipa oan ida atu ba remata iha tinan 2018 nia laran buat ne'ebé seidauk pronto, hanessan taka vitral iha leten (tanba udan tama), remata quarto no sacristia. To'o oras ne'e ita gasta tiha ona 307.771,28 usd. Hussi ossan ne'e, 20.628,70 sai hussi fundo paroquial (inclui 4.205,00 usd ne'ebé hetan iha peditório especial iha Cairui no Laleia), ne'e katak 6,7% de'it hussi custo total. Nu'udar sarani sira hatene processo construção complexo tebetebes tanba ai-teka ne'ebé bei'ala sira kuda iha área Lamu no *Direção Florestas* autoriza atu usa ba construção, Cairui oan balu halo fali negócio no entrega ba pároco ai messak dodok no aat. Maibé oras ne'e importante liu mak valoriza esforço ne'ebé sarani balu halo hodi bele harii duni capela ida-ne'e ne'ebé sarani barak mehi kleur ona. Oras ne'e daudaun, hamutuk ho equipa ne'ebé envolve iha construção, ha'u prepara livro no website kona-ba capela ida-ne'e ne'ebé ita bele dehan tau iha diálogo kle'an fiar sarani ho arquitetura tradicional Timor-Leste ninian.

Capela de São Francisco de Assis (Hatucarau)

Uluk *frei Capuchinho* sira visita Hatucarau fulan-fulan maibé ema otas boot lubuk mak mate no balu hola decisão atu tun mai hela metin iha Samalai. Ne'e duni, capela Hatucarau taka tiha ona.

Capela de São Boaventura (Turiaha)

Iha tinan rua nia laran ami ladún visita beibeik comunidade ida-ne'e tanba preocupa ho construção capela Cairui nian, maibé sira ne'ebé hela iha Turiaha sei barak no oras ne'e acesso fácil liután tanba iha estrada. Ha'u hanoín katak importante tebetebes visita comunidade ida-ne'e fulan-fulan. Povo Turiaha mehi ho capela foun, ne'ebé iha ona projeto, maibé ossan ne'ebé Timor oan ida promete ba povo mak seidak fó. Oras ne'e daudaun usa capela tuan ne'ebé sei di'ak natoon atu usa fulan-fulan.

Capela de São Pio de Pietrelcina (Raibu)

Oras ne'e daudaun, comunidade ki'ikoan ida-ne'e simu visita hussi missionário sira tinan ida dala rua ka dala tolu tanba sira uitoan de'it no sente dificuldade atu organiza an atu simu missionário sira fulan-fulan. Foin lalais sira hadi'a netik sira-nia capela oan.

PASTORAL LITÚRGICA

Celebração Mistério Cristo nian iha Sacramento sira

Celebração Litúrgica e Sacramentos

Sacramento do Baptismo

Iha Timor-Leste, *taxa natalidade* aas tebetebes, tan ne'e mós iha batismos barak. Iha tinan 2013, diocese Baucau nian fó sai diretório atu regula condições iha ne'ebé bele celebra sacramento ida-ne'e hodi protege labarik sira ne'ebé dala ruma moris iha ambiente ida ne'ebé la fó garantia atu educa labarik sira iha fiar sarani loloos. Tanba paróquia Laleia buka serviço ho responsabilidade, iha comunhão ho diretivas diocesanas, sarani balu halai fali ba paróquia Manatuto. Ita bele imagina problemas ne'ebé ida-ne'e hamossu tanba em vez de usa pedagogia ida atu hanorin sarani sira hanoin lissuk sira-nia moris, hatudu katak ita bele halai hussi problemas hodi ba fali paróquia seluk. Problema ida fali ne'ebé mossu beibeik mak kona-ba naran ne'ebé inan-aman hili ba sira-nia oan. Ha'u prepara daudaun documento rua ne'ebé sei publica iha blog www.haufiar.com, ida kona-ba sacramento ida-ne'e em geral no ida específico kona-ba labarik sira nia *naran*.

Sacramento da Eucaristia

Ami fó prioridade pastoral ba celebração sacramento Eucaristia nu'udar centro moris sarani sira nian. Iha Laleia ema barak mak participa domingo-domingo iha Eucaristia tan ne'e mak ami tau Missa rua domingo dadeer. Sarani sira participa ho hakmatek no ksolok iha celebração hodi halo liturgia furak tebetebes atu hahi'i Na'i nia naran santo. Iha Samalai, ema uitoan de'it mak forma comunidade sarani (maioria la participa) maibé sira badinas tebetebes no haksolok ho programa pastoral ne'ebé fó atenção ba sira-nia comunidade iha loron quinta no iha loron domingo. Iha Cairui, maski ema barak, ema uitoan de'it mak participa iha Eucaristia dominical. Ema Cairui religioso tebetebes maibé seidak persevera iha compromisso cristão. Maibé terça-terça capela nakonu ho labarik sira ne'ebé tuir catequese no ida-ne'e fó esperança ba comunidade sarani ne'ebá.

Missa de Requiem

Ida-ne'e Eucaristia ida ne'ebé ita celebra ho oração, knananuk no leituras próprias, hodi hussu ho fiar ba Maromak la'ós atu hamoos matebian nia sala (culpa) maibé atu hamenos todan (pena) hussi nia sala. Maibé, nu'udar sacramento, *Missa de Requiem* no Missa loron-loron nian folin hanessian tanba iha Missa ida de'it, ida-ne'ebé Jesus rassik halo no ita celebra loron-loron hodi hanoin Nia.

Iha paróquia Laleia ita celebra Missa ba matebian loron-loron menos iha loron sábado, tanba paróquia nia prioridade pastoral iha loron sábado mak catequese, no iha loron hirak ne'ebé diretório litúrgico bandu, hanessian loron domingo. Iha Missa domingo-domingo ita la temi matebian ida nia naran maibé ita harohan ba sira hotu ne'ebé liu ona ba mundo seluk. Bainhira ema mate ita celebra Missa Exequial, bolu Requiem tanba ita usa leituras no knananuk sira ne'ebé próprio. Bainhira celebra loron hitu, ita bolu Missa Loron da-7 nian (7º dia). Celebração Missa Requiem depende mós hussi possibilidade pastoral ne'ebé iha. Oras ne'e daudaun ita celebra *Missa de Requiem* bainhira ema mate, iha loron da-7 no iha aniversário dahuluk. Uluk ema mós hussu Missa Requiem iha loron haatnulu maibé ami la hatene tradição ne'e mai hussi ne'ebé no ema ne'ebé hussu mós la hatene explica; sira dehan de'it katak hein "mesa" loron haatnulu.

Nu'udar pároco, ha'u simu beibeik crítica hussi sarani sira tanba ha'u la simu atu celebra Missa Requiem iha loron no oras ne'ebé ida-idak hakarak. Maibé ha'u hanoin atu hamenos quantidade Missa Requiem, ne'ebé uluk dala ruma celebra rua ka tolu iha loron ida, atu haboot qualidade no valoriza prioridade pastorais seluk. Uluk, dala hira ha'u hahú Missa messak ka ho ema ida ka na'in rua de'it, tanba família rassik mak atrasa; ka ema atu lê iha Missa Requiem mós la iha no tem que buka lalais, ema la hakmatek. Nu'udar pároco ha'u iha obrigação atu hanorin sarani sira no hadi'a buat ne'ebé la loos.

Bainhira ema mai hussu Missa Requiem tanba de'it hafoun rate ka mehi kalan ho matebian, ka matan-dook mak haruka, ka tanba de'it família hakarak oho karau hodi halo festa, ne'e la'ós razão atu hussu Missa Requiem. Motivação loloos atu celebra Eucaristia mak fiar iha Jesus Cristo, Eucaristia nia Na'in, no ida-ne'e iha ona loron-loron iha igreja paroquial.

Nota ikus kona-bá rate. Iha tinan 2014 ami hala'o socialização iha ne'ebé ko'alia mós kona-bá rate nu'udar fatin ne'ebé merece respeito no tem que sai fatin moos. Autoridades comunitárias dehan katak iha ona plano atu halo lutu atu bibi la bele tama, maibé to'o oras ne'e sira seidak book.

Sacramento da Reconciliação (Confessa)

Bainhira ha'u sai pároco, tanba *frei Capuchinho* sira nia presença metin iha Laleia, ha'u mehi atu halo *Igreja de Nossa Senhora do Rosário* sai hanessan “santuário da misericórdia”, maibé, no maski apelo beibeik, realidade mak maioria nunca celebra sacramento Confessa. Ami amo-lulik sira sente katak ema lakon ba daudaun consciência kona-ba sala.

Sacramento da Confirmação (Crisma)

Amo-bispo fó Crisma iha paróquia Laleia cada tinan tolu ka tinan haat. Hirak ne'ebé tuir programa catequese sistemática (tinan sanulu) haksolok tanba haree celebração sacramento ida-ne'e nian nu'udar formação inicial nia rohan no biban atu compromete an ho comunidade sarani nu'udar membro ativo. Sira rassik sai catequistas ka membros grupo categorial ruma. Balu fali, ita foin haree ba dala uluk sira-nia oin, sira tau naran, tuir formação dala ida ka dala rua no hafoin Crisma tiha mós la mossu nafatin. Compromisso bossok-teen ne'ebé exige Kreda nia atenção!

Sacramento da Santa Unção (Mina Sarani)

Tinan-tinan, iha tempo Quaresma, pároco hala'o celebração comunitária iha Laleia, Samalai no Cairui hodi fó Mina Sarani ba ema ne'ebé moras ka otas boot no visita iha uma hirak ne'ebé la bele ona lao ba Uma-kreda. Iha tempo baibain, ema Laleia mós toman tiha ona bolu kedas amo bainhira ema ruma moras, maibé iha Samalai no Cairui ema seidak toman ka compreende.

Grupos de Apoio à Liturgia

Grupos ne'ebé fó apoio ba celebrações litúrgicas mak sira tuir mai:

Acólitos

Hanessan paróquia hotu-hotu iha Timor-Leste, paróquia Laleia mós sura ho acólitos barak. Ami-nia acólito sira messak ema di'ak no disponível atu hala'o sira-nia knaar, la'ós de'it iha loron domingo maibé mós iha Missa loron-loron nian. Maibé ita reconhece katak formação litúrgica kuran tebetebes. Ha'u rassik, hamutuk ho frei Hermenegildo no frei Manuel, koko marca formação ho sira maibé la'ós fácil atu hetan sira-nia participação iha ações formação. Foin lalais ne'e, diocese organiza formação iha paróquia-paróquia hodi apresenta *manual* ida ne'ebé diocese prepara no ha'u rassik mak corrige. Ha'u hein katak acólito sira bele aproveita manual ida-ne'e ba sira-nia formação no bele hala'o nafatin sira-nia knaar ho domin ne'ebé sira hatudu daudaun ona. Importante mós buka halibur acólitos hussi Samalai no Cairui atu hametin comunhão iha paróquia nia laran.

Ministros Extraordinários da Comunhão

Iha Cairui, iha *Ministro Extraordinário da Comunhão* (MEC) na'in rua, iha Samalai la iha no iha Laleia iha balu ne'ebé além de tulun fó Comunhão iha Eucaristia mós lori Jesus Sacramentado ba ema moras iha sira-nia uma rassik. Iha Cairui ami mós koko organiza lori Comunhão ba ema moras maibé sussar tebetebes tanba ema seidak compreende no dala ruma odamatan taka hela ba Ministros da Comunhão. Diocese mak organiza tinan-tinan formação ba MEC. Pároco sorumutu ho sira bainhira sente katak precisa hadi'a buat ruma. Sira messak badinas. Ha'u hanoin atu hatama ema foun ida ka rua iha Laleia maibé hein diocese atu marca formação. Dala ruma, tanba ignorância, no maski ha'u explica beibeik, sarani balu la kohi simu Comunhão hussi MEC sira nia liman. Maibé la iha explicação seluk a não ser ignorância!

Leitores

Iha Kreda Laleia baibain ema toman lê di'ak tebetebes Maromak nia Futar Lia. Iha Cairui no Samalai baibain ema toman hussu ba labarik sira atu lê. Tuir loloos labarik sira iha ona loron terça (Cairui) no quinta (Samalai) atu lê ne'e duni iha loron domingo bele fó fatin ba adultos, maibé iha Cairui no Samalai dala ruma difícil atu hetan ida-ne'e no, aat liu, dala ruma acólito ida mak sai hussi ninia fatin atu ba lê fali. Iha Laleia, bairro ne'ebé responsável mak buka ema atu lê leituras no hananu salmo. Problema dala ruma mak maski ema lê di'ak tebes maibé la buka posiciona *micro* ne'e duni assembleia la rona. Dala ruma acólitos mós la fó atenção atu hadi'a *micro* nia posição. Oras ne'e, Laleia, Samalai no Cairui iha ona sistema som foun.

Iha tinan barak nia laran, iha Laleia, ami encontro semana-semana ho ema ne'ebé atu lê iha loron domingo, atu prepara hamutuk, la'ós de'it atu treino leitura maibé liuliu atu sira ne'e bele compreende saída mak sira atu lê daudaun. Maibé barak mak falta; ema gosta participa maibé halai hussi formação. Semana-semana ami continua prepara cópia leituras atu bairro serviço bele foti no salmo uluk entrega gravador maibé tanba oras ne'e paróquia iha ninia rádio rassik ami passa salmo responsorial iha rádio loron-loron atu la'ós de'it ema ne'ebé atu hananu salmo maibé sarani tomak ne'ebé rona iha rádio bele aprende no canta iha loron domingo.

Grupos Corais

Ema Timor iha lian furak no gosta tebetebes atu hananu no ida-ne'e favorece participação iha liturgia no halo liturgia furak liután.

Coro Paroquial

Sira badinas tebetebes atu prepara celebração “loron boot” maibé ba loron domingo dahuluk fulan-fulan nian ita haree katak ladún iha preparação ka ensaio. Ha'u sugere atu sira sorumutu fulan-fulan pelo menos dala rua atu treino knananuk sira no kuda amizade entre sira no ho Maromak ne'ebé sira hahi'i ho knananuk messak furak, la'ós de'it ho ibun maibé liuliu iha fuan laran.

Coro Santa Clara

Coro Santa Clara harii hussi grupo Jufra ne'ebé la persevera iha formação sexta-sexta maibé ami haree katak sira gosta tebetebes mak canta; ne'e duni ohin loron iha ona Grupo Coral ne'ebé forma hussi foin-sa'e sira, liuliu jovem feto sira.

Coro Seluk

Iha Laleia, pároco fahe animação litúrgica Eucaristia sexta-sexta no domingo-domingo nian ba bairros nomos ba grupo seluk-seluk. Renovamento Carismático, maski la'ós grupo coral, sira mós hananu beibeik. Baibain, Pastoral da Criança, Catequista sira, no grupo selusseluk mós simu knaar atu hananu iha Eucaristia mais ou menos fulan ida dala ida.

Iha Cairui, tinan ruma liubá, catequista João Saba-Loi da Costa forma coro casais atu hananu fulan ida dala ida ka dala rua iha Eucaristia dominical maibé hanessan grupo hotu-hotu iha Cairui sira desanima lalais no mossu de'it bainhira atu prepara “loron boot”. Infelizmente linguagem ne'ebé ita rona beibeik hussi madre no padre sira rassik – “loron boot” – la favorece compressão loloos katak domingo hotu-hotu mak “loron boot”. Tan ne'e mak ita lalika hakfodak tanba haree ema barak hanaran an sarani tanba de'it mossu iha Natal no Páscoa!

Equipa de Decoração

Iha Laleia, loron-loron, zeladora sira hamoos Uma-kreda no sarani ida badinas hodi fasse hena sira ne'ebé usa iha liturgia (toalhas, sanguíneos, corporais, nst.). Iha Cairui dala barak ami celebra Missa ho hena fo'er, ema ladún cuidado ho sassán liturgia nian no ida-ne'e la'ós catequista nia sala tanba nia la bele halo buat hotu messak. Iha loron festa ruma, liuliu bainhira tem que usa salão iha *Centro São Francisco de Assis* (CESFA), equipa ida prepara fatin ho simplicidade no beleza tuir regras litúrgicas. Uluk sira toman falun altar ho buat oioin no ai-funan plástico maibé hodi explica didi'ak ba sira oinsá buat simples dala ruma bele furak liu, sira simu kedas. Igreja Laleia, iha tinan ikus sira ne'e, sai fatin ne'ebé ita sente gosto atu celebra Liturgia. Diocese tem que hala'o nafatin formação kona-ba ida-ne'e tanba ha'u haree tiha ona

ho ha'u-nia matan rassik madre-sira balu halo decoração saugati no halo tuir ida-idak nia hanoin. Maibé Kreda nia hanorin kona-ba sassán ida-idak ne'ebé usa iha Liturgia claro tebetebes no precisa de'it halo tuir.

Adoração do Santíssimo Sacramento

Desde *frei Capuchinho* sira nia hahú iha Laleia, ami halo *Adoração do Santíssimo* quinta-quinta loraik no kreda nakonu ho labarik no adolescente sira maibé pároco hateten ba professor sira katak labele obriga labarik sira mai Uma-kreda; iniciativa tem que mossu hussi sira rassik. Maibé la kleur ita haree katak participação hahú mínima. Iha tinan ikus sira-ne'e ami muda *Adoração do Santíssimo Sacramento* ba sexta kalan, hafoin Eucaristia, no ita haree katak dala ruma igreja quase nakonu ho adulto no jovem-sira ne'ebé tuir, la'ós tanba ema obriga, maibé tanba sira rassik hakarak no *Adoração do Santíssimo* hala'o ho hakmatek, nonook, ho unção no dignidade. Tinan rua liubá ami mós hala'o procissão ho *Santíssimo Sacramento* hale'u reino Laleia tomak. Maski procissão ne'e hala'o neineik iha oras barak nia laran, sarani sira hatudu respeito boot tebetebes. Iha Cairui ami mós koko tiha ona halo *Adoração do Santíssimo* maibé sarani sira la mossu no missionário sira ho catequista hakne'ak messak iha capela.

Oração de Laudes

Iha comunhão ho Kreda tomak, frei-sira, LCM, madre-sira no sarani balu, toman kleur ona reza *Oração de Laudes* iha loron segunda, terça, quinta, sexta no sábado, tuku 6,30 dadeer.

PASTORAL PROFÉTICA

Iha Pastoral Profética ita inclui buat hotu ne'ebé tulun hatene, hagle'an no haklaken fiar sarani

Catequese da Infância e Adolescência

Iha tinan 2004, hafoin hahú tiha forma catequista sira, hahú programa catequese sistemática ho duração tinan 10, ne'e katak labarik sira tama catequese ho tinan 7 no remata ho tinan 17. Frei Fernando mak traduz ba dalen tetun matadalan ba catequista sira atu tuir. Iha Laleia, programa catequese la'ó di'ak tebetebes tanba labarik sira barak mak gosta, catequista sira mós haka'as an atu prepara didi'ak encontros catequese nian no inan-aman sira mós toman tiha ona. Iha Samalai oras ne'e daudaun la hetan ema ida atu sai catequista tan-ne'e missionário sira rassik mak tem que ba quinta-quinta. Iha Cairui situação sei di'ak maibé la'ós sustentável tanba maski labarik sira barak, catequista uitoan de'it no inan-aman rassik, tanba la comprende, la apoio oan sira iha sira-nia formação cristã. Tinan-tinan, iha tinan catequese nia rohan, ita halo "passeio" no avaliação. Foin lalais mós harii *Comissão de Pais* atu tulun *Secretariado Catequese nian*.

Coro da Catequese

Foufoun ema la koho harii *Coro da Catequese* maibé iha tinan 2016/2017 sai ona realidade no sucesso boot tanba catequese nia grupo ida-idak em vez de hanoim de'it ba knananuk sira bele prepara didi'ak Eucaristia no *Coro da Catequese* mak hola responsabilidade semana-semana atu prepara knananuk sira.

Formação de Catequistas

Sábado ikus fulan-fulan nian iha formação ba catequista sira. Formação ne'e importante atu sira bele halo atualização ba sira-nia conhecimento no compromisso nu'udar catequistas. Infelizmente balu nunca tuir, maibé maioria badinas tebetebes. Iha Cairui difícil atu hetan catequista sira nia participação iha formação.

Catequese de Adultos

Ami buka aproveita oportunidade hotu-hotu atu fó netik formação ruma ba adulto sira.

Labarik sira ne'ebé tuir catequese sira-nia aman-inan

Fulan-fulan, iha domingo ikus, Missa hotu tiha, labarik sira ne'ebé tuir catequese sira-nia aman-inan tem que tuir formação ne'ebé baibain *Secretariado Catequese nian* mak prepara ho *Leigos Capuchinhos em Missão* sira nia tulun.

Preparação ba Batismo

Atu sarani labarik ida iha Laleia, inan-aman sira no inan sarani aman sarani sira tem que tuir formação dala haat ne'ebé leigo ida mak fó. Iha formação nia laran, sira bele aprende kona-ba saída mak Sacramento Batismo, símbolos batismais no rito batismo nian. Maski ida rua lori formação ne'e halimar, maioria sério tebetebes. Iha paróquia Laleia ami la simu "surat" hussi pároco seluk tanba ami koko dala barak hussu buat ruma ba sira no sira nonook de'it to'o reconhece katak ba iha paróquia hussu surat ne'e maibé la tuir formação ida, no dala ruma Missa iha loron domingo mós la tuir. Iha Samalai no Cairui formação ba batismo ladún lao liuliu tanba problema lian tanba ema barak la comprende tetun.

Preparação ba Sacramento Kaben

Uluk iha formação ba noivos ne'ebé inclui aspeto saúde, economia familiar no teologia sacramental maibé ita haree katak balu serviço iha Díli no sente sussar atu mai tuir formação iha Laleia. Ne'e duni pároco rassik hahú hala'o diálogo pessoal ho sira no hafoin prepara hamutuk ho sira rito kaben nian. Iha paróquia Laleia, casamento hotu-hotu ne'ebé ha'u preside, noivo sira hela hamutuk kleur ona, maioria ho oan barak. Iha tinan lima nia laran la hetan nem casal ida ne'ebé halo tuir Kreda nia hanorin, katak fó importância ba fase namoro, hatene malu didi'ak, simu sacramento kaben, hafoin mak ba hela

hamutuk. No ida-ne'e sei sussar tebes atu muda tanba ema valoriza liu fali cerimónia “prenda” do que casamento rassik no lia-na'in católico sira mós preocupa liu fali ho barlaque do que ho fiar sarani. Iha ne'e mak ita haree didi'ak oinsá la iha coerência entre fiar no moris, hanessian bispo sira hateten iha “Mai hare Timor” nº 194-196.

Pastoral Bíblica

Iha tinan sanulu-ressin-haat nia laran, missionário sira iha preocupação boot atu halo pastoral bíblica no koko buat oiain hanessian “procissão da Bíblia”, “loron Bíblia nian”, oferece Testamento Foun ba umakain ida-idak iha paróquia, formação bíblica iha bairro-bairro, “Bíblia Paroquial” tama uma sai uma, forma “grupo bíblico” ida, estuda “parábolas da misericórdia” iha bairro-bairro no selusseluk tan. Ida ne'ebé ita haree ema gosta duni mak “Lectio Divina” iha ema nia uma rassik maski sussar nafatin atu hetan mane sira nia participação.

Pastoral Vocacional

Iha tinan ikus sira-ne'e paróquia organiza encontro vocacional balu iha Laleia no Cairui. Participante sira maioria acólitos, balun otas ki'ik maibé ita labele desanima maibé acompanha nafatin sira. Iha jovem fetu balu ne'ebé tama iha congregação religiosa, liuliu FMA no CSP maibé sussar atu hetan mane ida ne'ebé hakarak sai padre no liuliu atu sai irmão. Ami frei sira rassik nia candidatos maioria hussi cultura manbae no baikenu. Ha'u hanoin katak jeito ne'ebé ema galolen moris sira-nia fiar, dook hussi moris loron-loron nian, la favorece atu mossu vocações ba Vida Religiosa hanessian iha rai seluk-seluk.

Grupos e Movimentos

Apostolado da Oração

Iha tinan barak nia laran, Laleia la iha missionários ka padres permanentes no *Apostolado da Oração* sira-nia knaar importante tebetebes. Zeladora sira acompanha sarani sira iha bairro-bairro no organiza serviço limpeza iha Uma-kreda. Sira mós suku toalhas ba altar no hena sira ne'ebé precisa ba Igreja. Iha tinan ikus sira-ne'e ita haree katak *Apostolado Oração* iha Cairui “mate liu” no iha Laleia iha dificuldade atu hafoun an. Karik tem que muda liderança iha movimento ida-ne'e hodi hatama ema ho capacidade atu dada ema foun.

Renovamento Carismático Católico

Bainhira grupo hahú, tanba simu influência negativa hussi grupo hanessian hussi Baucau no Díli, difícil tebetebes atu acompanha grupo ida-ne'e no iha problemas barak iha grupo nia leet. Maibé bainhira sira hahú compreende katak grupo hotu-hotu tem que moris iha comunhão ho Kreda nia fiar no ho hirak ne'ebé responsáveis ba paróquia, grupo ida-ne'e sai pároco nia “belun di'ak” tanba sira messak badinas atu harohan, atu hananu no saída de'it mak Kreda precisa hussi sira. Ha'u agradece tebes ba Maromak tanba dada ema barak atu compromete an ho Kreda liu hussi grupo ida-ne'e.

Juventude Franciscana

Pároco dahuluk koko atu forma *Jobifran* maibé grupo ida-ne'e mohu tanba grupo ida la bele depende de'it hussi ema ida ka rua, maibé ema hotu iha grupo tem que sente motivação. Ami koko hahú fali ho encontro formação sexta-sexta loraik durante tinan ida tomak maibé ami haree katak maski sira messak ema di'ak falta perseverança, ne'e duni sira la to'o iha compromisso iha *Jufra*, ne'ebé movimento franciscano internacional, no grupo “mate” hodi moris fila fali nu'udar grupo coral (Coro de Santa Clara).

FOSCA

Ida-ne'e mak pastoral juvenil diocese Baucau nian. Iha Laleia ami koko atu hafoun FOSCA iha tinan 2003 nia rohan maibé sira-nia líder quase la mossu iha Uma-kreda no bainhira mossu iha procissões

ka iha “loron boot” mossu de’it atu halo problemas tanba buat hotu nia halo no ko’alia ho violência, ne’e duni, iha tinan barak nia laran, Paróquia la bele sura ho sira. Ita hatene katak sira balu mós envolve iha grupos ilegais artes marciais no provoca beibeik problemas iha comunidade nia leet; hafoin, sira mossu iha “loron boot” atu comunga hotu! Tinan ruma liubá ami koko atu hafoun FOSCA Laleia maibé maioria hateten sim ho ibun maibé realidade mak la compromete an ho Kreda. Ida-ne’e sei sai desafio boot ba pároco foun no ba Kreda tomak! Ha’u sei hanoin nafatin Dom Basílio do Nascimento nia liafuan ba sira iha peregrinação ba Soibada iha tinan 2010: «*imi iha ne’e bessik atus rua, maibé ba ha’u di’ak liu hetan ida ne’ebé di’ak no comprometido ho Kreda do que atus rua ne’ebé mossu iha loron ohin de’it*».

Devoção sira

Oração do Rosário

Iha Timor-Leste, hanessian iha Solor no Larantuca, fiar sarani tama liuliu hussi devoção mariana. Ba Timor oan barak, Na’i Feto mak Maromak loloos. Evangelização ohin loron nian fó biban atu haloos sala ida-ne’e. Dala ida ema hateten mai ha’u katak molok frei sira mai Laleia, povo nia Maromak mak N^a S^a do Rosário nia ilas. Frei sira mak lori Maromak ne’ebé hetan hussi Bíblia. Maibé devoção mariana sei nafatin importante tebetebes no tinan-tinan, iha fulan maio, loron-loron Kreda Laleia nakonu ho sarani sira ne’ebé mai atu reza oração rosário nian; nune’e mós fulan-fulan iha loron 13. Iha Samalai no Cairui grupo ki’ik oan ida mós halibur iha capela atu hakle’an sira-nia devoção ba Nossa Senhora, Kreda nia Inan.

Sagrada Família

Iha domingo *Sagrada Família* ninian, iha fulan dezembro nia rohan, *Sagrada Família* nia ilas sai hussi Uma-kreda no tama uma sai uma to’o tama fali iha Uma-kreda. Ida-ne’e devoção importante no quase família hotu-hotu hakarak simu iha sira-nia uma. Baibain família ne’ebé simu *Sagrada Família* nia ilas halibur ho zeladora no vizinho sira atu reza ho devoção no dala ruma han hamutuk. Maibé dala ruma ema balu hemu tua to’o lanu hodi estraga ambiente oração nian. Ema barak mós la mai Uma-kreda iha loron domingo tanba dehan «Maromak iha ha’u-nia uma, ha’u la bele hussik nia messak!»! Buat sira ne’e ita tem que hadi’a neineik-neineik, ho paciência.

Dalan Cruz no Dalan Naroman

Iha tempo Quaresma, sexta-sexta, sarani sira barak mak tuir ho devoção Dalan Cruz (Via Crucis) no, iha tempo Páscoa, Dalan Naroman nian (Via Lucis).

Pastoral da Comunicação Social

Rádio Na’i Feto Laleia

Iha tinan 2010, hodi haree katak ema barak hanaran an sarani maibé la tuir Missa iha loron domingo ka participa iha moris comunidade sarani nian, ha’u hahú hanoin oinsá bele monta rádio FM ida, equipamento no *software* ne’ebé precisa, atu bele ba hassoru ema sira ne’e iha fatin ne’ebé sira hela nomos hirak ne’ebé hakarak mai Missa maibé la bele tanba moras. Kreda hatene katak rádio bele sai instrumento evangelização furak tebetebes. Iha fulan janeiro 2013 ami hameno equipamento hussi rai Itália liu hussi empresa ida iha rai Portugal (Sitemaster). Entretanto, ami hadi’a fatin ne’ebé uluk usa ba máquina atu dulas hare no irmã *Jesuína de Sousa* no irmã *Joana Ribeiro* hahú prepara an atu bele serviço iha ne’ebá. Rádio hahú ninia emissão oficial iha loron 07/10/2013 ho frequência 88.5 FM no iha horário tuir mai ne’e: hussi tuku 8,00 dadeer to’o tuku 8,30 kalan. Bainhira irmã *Jesuína* no irmã *Joana* la bele ona hala’o serviço iha rádio, ami convida *Josefina de Jesus da Costa Gusmão* no *Antónia de Fátima Gusmão de Sousa*, estudantes iha Ensino Secundário, no sira serviço iha rádio hussi loron 01/02/2015 to’o loron 30/09/2016. Hafoin, tanba sira hanoin atu ba Universidade, ami contrato fali *Maria Rufina da Costa* ne’ebé oras ne’e daudaun mak fó lian ba rádio paróquia nian, nafatin ho irmã *Berni Sullivan*, irmã *Rosa Ribeiro*, irmã *Sandrina Silva* no irmão *Luís Silva* sira-nia tulun.

Maski rádio paróquia nian, única rádio paroquial iha Timor laran tomak, missionário sira (*frei Capuchinho sira* no *Leigos Capuchinhos em Missão*) mak suporta despesas tomak iha tinan haat nia laran, hamutuk 34.590,32 usd, ne'ebé inclui hadi'a fatin, hola equipamento no selu salário. To'o fulan maio 2017 paróquia la gasta buat ida ho rádio. Hahú fulan junho 2017 mak, tanba justiça no tanba paróquia tem que hahú responsabiliza ho buat ne'ebé ninian, mak paróquia hahú selu *Maria Rufina* ninia salário fulan-fulan. Oras ne'e, ho irmão *Pedro Cardoso* nia tulun, *Rádio Na'i Feto Laleia* fó hakat ida tan hodi to'o iha mundo tomak liu hussi internet: www.laleia.org/radio. Maluk-sira iha rai liur ne'ebé hakarak rona *Rádio Na'i Feto Laleia* liu hossi internet sei hanoin katak oras tuku 8,00 dadeer to'o tuku 8,30 kalan ne'e tuir oras Timor-Leste nian. Hakat tuir mai mak sei acompanha processo legalização iha *Autoridade Nacional de Comunicações*, processo ne'ebé hahú tiha ona iha tinan 2012.

Página Web

Paróquia Laleia iha domínio web ida – www.laleia.org – no pároco rassik mak desenvolve daudaun website ida atu ema hussi mundo tomak bele acesso hodi hatene liután ita-nia paróquia.

Facebook

Paróquia mós iha página ida iha Facebook – www.facebook.com/paroquiadelaleia – ho “gosto” ka “like” bessik rihun sia, no sai plataforma comunicação importante, liuliu ho jovem sira.

PASTORAL SOCIAL

Sassin domin liuliu ba ema kiak sira

Fó Liman ba Malu

Liu hussi programa ida-ne'e, missionário sira buka fó apoio ba ema kbiit laek sira, dala ruma hodi fó hahán, roupa, cadeira ka mesa ruma, materiais atu hadi'a uma, nst. To'o loron 31/06/2017 ami gasta 11.762,38 usd (la usa ossan hussi fundo paroquial; *frei Capuchinho sira* no *Leigos Capuchinhos em Missão* mak buka doador sira no ossan atu tulun paróquia).

Pastoral da Saúde

Saúde buat fundamental ida ba nação nia desenvolvimento no iha tinan ikus sira-ne'e paróquia continua contribui ba área ida-ne'e hussi perspectiva pastoral.

Pastoral da Criança

Pastoral da Criança hahú implementa iha tinan 2000 ho CNBB nia apoio liu hussi madre sira hussi rai Brasil. Projeto ne'e remata iha tinan 2010 no hussi tempo ne'ebá to'o agora, missionário sira mak fó apoio nafatin ba *Pastoral da Criança* no serviço hamutuk ho SSKA hussi *Ministério da Saúde* hodi hala'o *celebração da vida* fulan ida dala haat (suco tolu nomos Samalaí) no liu hussi líderes iha bairro ida-idak. Hussi tinan 2014 to'o tinan 2017, ami gasta 4.624,55 usd (la usa ossan hussi fundo paroquial; *frei Capuchinho sira* no *Leigos Capuchinhos em Missão* mak buka doador sira no ossan atu tulun paróquia).

Centro da Pastoral da Criança

Hodi aproveita katak missionária balu no madre ida enfermeiras, hussi tinan 2014 to'o tinan 2017 ami hala'o reforço iha *Pastoral da Criança* nia lala'ok hodi loke *Centro da Pastoral da Criança* ne'ebé taka foin lalais ne'e hafoin doutora na'in tolu hussi rai Portugal serviço iha ne'ebá iha fulan tolu nia laran.

Pastoral do Idoso

Madre-sira (FMNS) mak acompanha loron-loron ema otas boot sira, liuliu hirak ne'ebé moras. Iha tempo Advento no Quaresma ita mós buka halo encontro iha Igreja paroquial no pároco rassik ba visita iha uma hirak ne'ebé la bele mai iha Uma-kreda. *Leigos Capuchinhos em Missão* mós buka acompanha no tulun pároco resolve situação balu, liuliu bainhira ita haree katak família la tau matan didi'ak ba avô sira.

Pastoral da Pessoa com Deficiência

Pastoral ida-ne'e buka hakle'an serviço ne'ebé madre Zélia hahú iha fatin balu. Iha tinan 2011 to'o 2013 pároco sai hanessian assistente diocesano ba pastoral ida-ne'e no hamutuk ho *Leigos Capuchinhos em Missão* ba visita paróquia hotu-hotu diocese Baucau nian atu buka sensibiliza *agentes da pastoral* ba necessidade atu acompanha no integra ema ho deficiência iha comunidade sarani. Hafoin 2014 ami acompanha ema ho deficiência iha paróquia Laleia de'it.

Pastoral da Educação

Hanessian saúde, educação mós área fundamental ida ba nação nia desenvolvimento, ne'ebé Kreda acompanha liuliu iha perspectiva pastoral.

Jardim de Infância «Irmão Sol»

Loke iha tinan 2011 nia rohan ho irmã Joana Ribeiro (LCM) no irmã Celina Fernandes (LCM). Bainhira loke, papel no lapiseira ida mós la iha. Iha tempo ne'ebá buat hotu hetan hussi ami-nia belun sira hussi rai Portugal. Ami hahú hodi hadi'a uitoan *Centro Comunitário* no gasta ho ida-ne'e 6.025,00 usd (la usa ossan hussi fundo paroquial; *frei Capuchinho sira* no *Leigos Capuchinhos em Missão* mak buka doador sira no

ossan atu tulun paróquia). Bainhira loke, irmãs Leigas mak fó hussi sira-nia hahán rassik ba labarik sira. Bainhira madres FMNS to’o iha Laleia, *irmã Clara do Céu* no *irmã Rosevania da Conceição* mak responsáveis ba coordenação pedagógica (acompanha loran-loron labarik sira) no halo serviço importante no furak tebetebes, maibé ossan ba despesas fulan-fulan nian pároco mak tem que buka tanba ossan ne’ebé inanan selu la to’o. Ne’e duni, no maski ami bolu escola paróquia nian, hussi tinan 2013 to’o loran 30/06/2017 missionário sira (*frei Capuchinho sira* no *Leigos Capuchinhos em Missão*) mak selu despesas tomak, hamutuk 22.885,57 usd. Madre sira (FMNS) hola responsabilidade ba *Jardim de Infância*, nu’udar projeto congregação ninian, hahú iha loran 01/07/2017.

A.T.L.

Irmãs FMNS hala’o encontros loraik, iha Biblioteca, hodi acompanha labarik sira no tulun sira hake’an matérias hussi escola.

Biblioteca «São Lourenço de Brindes»

Fatin luan no hakmatek iha ne’ebé iha livros barak ho lian tetun no português no labarik sira bele ba estuda iha ne’ebá. Objetivo principal mak tulun labarik sira toman atu lê.

Curso de Música

Iha tinan 2017, *irmã Sandrina Silva* koko hanorin música ba labarik sira. Grupo oan ida-ne’e sai sucesso boot tanba iha de’it fulan ruma nia laran ita bele ona haree (no rona) resultado aprendizagem.

Curso de Língua Portuguesa

Ami koko tiha ona dala barak organiza *Curso de Língua Portuguesa* hodi hanoin liuliu adolescente no foin-sa’e sira maibé dala ida de’it mak ita bele dehan curso ne’e sai sucesso tanba alunos metin iha tinan ida tomak nia laran. Madre-sira mós koko tiha ona. População Laleia hatudu desinteresse geral ba lian português, maski terça no quinta dadeer sarani balu gosta participa iha Missa ho lian português.

Curso de Alfabetização

Iha tinan ikus sira-ne’e ami organiza *Curso de Alfabetização* iha Laleia, Samalai no Cairui maibé la sucesso tanba ema la mossu. Objetivo mak tulun ema ne’ebé la hatene lê pelo menos bele aprende atu assina sira-nia naran. Maibé, maski missionário sira nia disponibilidade, ema la mossu.

Pastoral da Cultura

Iha tinan 2012, ami hala’o programa investigação kona-ba “cultura Laleia”, nu’udar preparação atu loke *Centro São Francisco de Assis* (15/08/2012). Ami suru tais, ensaio dança tradicional sira, prepara hahán tuir cultura, hakerek dadolin, nst. Ami mós halo homenagem ba *Dom Martinho da Costa Lopes*, nu’udar iniciativa *frei Capuchinho sira* nian. Fotos no vídeos ne’ebé prepara iha tempo ne’ebá mós sei publica iha internet.

Centro de São Francisco de Assis

Iha tinan 2011, hodi haree katak paróquia la iha fatin natoon atu atende necessidades paróquia nian, missionário sira (*frei Capuchinho sira* no *Leigos Capuchinhos em Missão*) hahú halibur ossan hussi frei sira nia *comunidades cristãs* iha Portugal no Austrália no gasta 91.460,00 usd atu harii *Centro São Francisco de Assis* (CESFA), seidauk sura ho armários no computadores. CESFA benze iha loran 14/08/2012 ho festa furak ne’ebé realiza loraik no kalan, ho dança no música tradicional, apresenta tais ho padrão hussi região ida-ne’e, hahán tradicional, nst.

Centro São Francisco de Assis iha sala ida ne’ebé dedica ba *Dom Martinho da Costa Lopes* nia memória no usa ba catequese no formação. Iha mós fatin atendimento (segunda to’o sexta, hussi tuku 8,00 to’o tuku 12,00 dadeer) iha ne’ebé ema bele tau naran atu hassai certidão, hassai fotocópias, nst. Iha mós Biblioteca ida ne’ebé iha livros barak ho lia tetun no português nomos usa iha loran balu nu’udar sala de formação no iha loran seluk nu’udar ATTL ne’ebé irmãs FMNS mak dirige. *Cartório Paroquial* iha armários

foun ne'ebé permite organiza didi'ak livros de assentos no documento sira seluk paróquia nian no facilita atendimento ba sarani sira ho dignidade no hakmatek. Pároco mak usa fatin ida-ne'e, liuliu atu halo sarani sira nia documentos maibé mós dala ruma atu ko'alia ka confessa sarani sira. Iha mós sala ida naran PED (Pastoral ba Ema ho Deficiência) ne'ebé uluk usa atu prepara atividades ba *ema ho deficiência* bainhira frei Filipe sei responsável ba pastoral ida-ne'e iha diocese tomak no oras ne'e daudaun usa nu'udar fatin ne'ebé LCM usa atu prepara atividade oioin iha paróquia. Iha mós hariis fatin tolu, ida ba mane sira, ida ba feto sira no ida luan ne'ebé tuir normas internacionais atu ema ho deficiência bele tama ho cadeira rodas.

Centro de Santa Clara de Assis

Iha tinan 2016, missionário sira (*frei Capuchinho sira* no *Leigos Capuchinhos em Missão*) apresenta proposta ba *Catholic Mission Austrália*, ne'ebé hetan aprovação no financiamento 100% (90.187,12 usd) atu harii *Centro Pastoral no Comunitário* ida iha Samalai. Ami hameno construção pré-fabricada iha Austrália (ami la book ossan), no ami-nia belun sira hussi rai Austrália mak mai harii centro ida-ne'e iha fulan fevereiro 2017 (sira rassik mak selu sira-nia bilhete avião). Iha de'it loron ruanulu-ressin-tolu nia laran ami remata serviço principal. Hafoin, iha fulan sira tuir mai, *irmão Luís Silva* mak buka remata serviço.

Iha sarani balu ne'ebé la mai ajuda tanba ami la bele selu ossan, maski centro ida-ne'e ba sira-nia comunidade rassik nia di'ak. Balu, liuliu líder comunidade ida, mai tan murmura no hamuu sira ne'ebé hakarak tulun, hahalok ne'ebé ema católico loloos la halo. Maibé ita hanoin liuliu ho laran agradece ba sira ne'ebé maski la simu ossan mai ajuda ho neon ho laran tomak. Loron-loron ami serviço hamutuk no han meio-dia hamutuk no iha fulan fevereiro nia rohan hahú kedas usa ba catequese, atu atende sarani sira hodi halo sira-nia documentos, ba Pastoral da Criança, no programa sira seluk.

Carpintaria Social

Iha tinan 2009, frei Fernando, nu'udar pároco, hakarak harii projeto social ruma hodi tulun povo Laleia. Hafoin tuur tiha hamutuk ho nia Conselho Económico, sira hanoin atu harii carpintaria comunitária tanba ema barak mak tem que ba Manatuto ka Díli atu hola odamatan, cama ka armário. Iha Laleia iha ona badain barak maibé sira la serviço hamutuk no la iha fatin di'ak atu serviço. Conselho Económico hanoin katak hafoin harii fatin di'ak ida no hola máquina balun, badain sira sei hakarak serviço hamutuk hanessan *cooperativa*. Ami hahú halibur ossan hussi frei sira nia *comunidades cristãs* iha Portugal, Espanha no Austrália no *Chefe de Suco* Hatu-Ralan, ko'alia tiha ho sarani sira, fó rai ba paróquia atu harii carpintaria. Iha loron 08/10/2010 amo-bispo benze fatuk dahuluk no construção remata lalais. Hamutuk, *frei Capuchinho sira* gasta 107.900,00 usd atu oferece uma ida-ne'e ba paróquia, seidauk sura ho máquinas no ferramentas.

Maibé ikus mai, badain balu de'it mak hakarak serviço. Sr. Domingos de Sousa mak sai hanessan responsável no carpintaria serviço iha tinan rua nia laran hodi produz sassán oioin ne'ebé sarani sira hameno. Maibé mossu dificuldade rua: 1) Sr. Domingos la bele serviço messak no maski ami convida beibeik badain sira seluk atu ba serviço iha ne'ebá, maioria la kohi tanba tem que tuir horário no balu la kohi serviço tanba simu daudaun ossan veteranos, dehan la precisa; 2) Saída de'it mak precisa, hanessan ai, pregos, verniz, fechaduras, nst., pároco no vigário paroquial mak tem que ba hola Díli. Serviço hanessan ne'e la'ós sustentável no tanba la iha "plano b", la kleur ami taka carpintaria.

Balu hussu tansá mak la loke fila fali carpintaria? Razão mak la hetan ema atu serviço iha ne'ebá. Ne'e mak realidade! Iha badain ida hussi Baucau ne'ebé hakarak toma conta ba carpintaria maibé ami frei sira harii carpintaria hodi cria emprego no serve população paróquia Laleia nian. Hafoin, iha tinan rua ka tolu nia laran ami usa fatin ne'ebá atu rai ai no material sira seluk ba capela foun Cairui nian. Oras ne'e daudaun mamuk. Ha'u-nia sugestão ba pároco foun mak prepara fatin ne'ebá atu bele usa nu'udar *Salão Paroquial*, ba encontros de formação, festas, nst. Maibé uluk tem que resolve problema delimitação rai nian tanba maski iha título propriedade, vizinho sira kee rai no harii sira-nia uma hodi ocupa rai ne'ebé uluk

ema fó. No bainhira mossu problema ida-ne'e, ex membro ida hussi *Conselho Económico Paroquial* em vez de tulun paróquia empata problema tanba loja na'in nia compadre rassik.

Pastoral da Ecologia

Lixo ne'ebé missão produz, ami buka reutiliza. Buat ne'ebé la bele usa fila fali, hanessan “*kaleng*”, ami lori ba Díli. Hahán ressin ami fó ba fahi ne'ebé ami hakiak.

Limpeza hale'u Uma-kreda no capelas

Fatin hale'u Kreda Laleia no capela sira moos tanba senhora sira hamoos beibeik. Problema mak balada sira ne'ebé hussik de'it nafatin no buat ne'ebé frei sira kuda atu hafutar fatin hale'u igreja, bibi no fahi estraga kedas. Desde 2003 ami buka consciencializa comunidade katak ida-ne'e sai problema boot ba saúde pública maibé autoridades rassik la cumpre lei ne'ebé Parlamento Nacional hafoun no publica iha loron 14/05/2014 (Decreto-Lei nº 11 no nº 12). Problema ida-ne'e mós mossu iha Samalai iha ne'ebé balada sira tama uma sai uma, no iha Cairui iha ne'ebé didin sira capela nian fo'er liu maski capela foun seidak tinan rua.

Luta hassoru tabaco

Iha fatin hale'u Igreja no capelas, ami bandu ema atu fuma. Ami fó hanoin ba ema no taka cartaz iha fatin-fatin. La'ós de'it tanba Decreto-Lei Nº 14/2016, hussi 8 junho, la'ós de'it tanba Lei, maibé ami buka explica razões kona-ba impacto tabaco ninian iha saúde pública. Ema barak mak compreende no respeita maibé balu, liuliu hirak ne'ebé iha obrigação atu fó exemplo, hanessan *liderança comunitária* no *intelectuais*, mak aat liu. Hanessan ne'e sussar atu halo mudança!

Laudato Si'

Iha tinan 2015, ha'u rassik mak traduz ba lia tetun documento *Laudato Si'* hussi Amo-Papa Francisco, “*kona-ba cuidado ho uma ne'ebé ita botu ninian*”. Apresentação ba edição da-uluk, ho 154 páginas, hala'o iha loron 20/11/2015, iha Díli, ho bispos, padres, madres no *intelectuais* barak sira nia presença, maibé sarani Laleia ladún hatudu interesse atu hakle'an documento ida-ne'e, maski ami koko programa oioin. Ida-ne'e mossu karik tanba ema seidak compreende oinsá importante tebetebes sarani ida-idak hola responsabilidade kona-ba proteção meio-ambiente ninian. Hamutuk ho labarik no foin-sa'e sira, iha coordenação ho KEUL, ami consegue duni hala'o atividade ida atu hamoos tassiibun iha Laleia, maibé ita haree katak mudança mentalidade sei kleur. Ida-ne'e la'ós Laleia de'it nia problema, ida-ne'e problema geral: ema barak, inclui mós foin-sa'e sira, soe lixo arbiru no ita halo viagem karik ita sei haree hetan lixo iha estrada ninin iha fatin hotu-hotu. Iha loron 19 novembro 2017, Loron Mundial Ema Kiak sira nian, sei publica *Laudato Si'* nia edição daruak ho ortografia ne'ebé ami mós tuir hodi hakerek relatório ida-ne'e.

Agricultura

Bainhira Laleia sai paróquia, Bispo hussu ba sarani sira atu oferece rai ba *frei Capuchinho sira* no sira fó rai iha *Wé-Noren* ho bessik hectare haat maibé *frei Capuchinho sira* tau fali rai iha paróquia nia naran. Ami koko atu fura bé dala rua maibé la hetan bé natoon atu halo projeto agricultura nu'udar ami mehi. Maski ida-ne'e, ami empresta rai sorin ida ba agricultor sira balu ne'ebé hakarak kuda modo no frei sira mós usa sorin seluk atu kuda modo ruma ba sira-nia moris loron-loron nian iha convento. Acordo ho agricultores ne'ebé usa rai missão nian ne'e mak bainhira sira ku'u modo ruma tem que lori uitoan ba missão no ba *Jardim de Infância* atu fó han ba labarik sira, maibé barak mak la entrega buat ida. Ita haree katak sira barak mós la preocupa atu hamoos luto no balu sunu du'ut hodi estraga mangueira ne'ebé iha ne'ebá.

Ha'u hanoin katak aban-bainrua pároco tem que hanoin fila fali projeto agricultura. Karik bele entrega ba ema ida de'it atu tau matan ba rai missão nian tomak, fila rai hodi usa trator no haboot produtividade atu hetan modo natoon ba missionário sira nia necessidade tanba to' agora missionário sira depende nafatin hussi ossan ne'ebé *frei Capuchinho sira* hussi rai Portugal haruka. Hodi halo luto no koko dala rua atu fura bé ami gasta hamutuk 63.427,00 usd. Hassai 1.000,00 usd hussi *fundo paroquial* (1,58%) no missionário sira (*frei Capuchinho sira* no *Leigos Capuchinhos em Missão*) tau 62.427,00 usd (98,42%).

CARTÓRIO PAROQUIAL

Introdução

Bainhira ha'u sai pároco, no maski envolve pessoalmente iha processo organização administrativa diocese Baucau nian, ha'u hatene tiha ona katak *administração paroquial* la salva ema ida nia klamar maibé bele tulun maka'as iha paróquia no iha diocese nia organização. Hafoin tempo ruma, bainhira haree katak nível corrupção aas tebetebes iha *cartórios paroquiais* balu, hanessian uluk iha Laleia bainhira *catequistas centro* mak halo certidões, ha'u compreende katak halo cumpre regras diocesanas ba *administração paroquial* iha mós aspeto moral balu ne'ebé importante tanba hameno ema atu moris iha lia loos. Ne'e duni, reforma *administração paroquial* iha diocese tomak, iha aspeto barak, sai buat positivo tebetebes.

Ha'u acompanha rigor ne'ebé mai hussi pároco dahuluk ho serviço foun oioin ne'ebé presta ba sarani sira hanessian foti iha Manatuto assentos de baptismo hussi tinan 1946 to'o 1948 ne'ebé ami seidauk iha, no assentos de casamento hussi tinan 1945 to'o 2005, remata *digitalização documentos* no halo *base de dados*. Laleia mak paróquia dahuluk iha diocese atu remata serviço ida-ne'e.

Ami mós muda fatin atendimento ba sarani sira hussi convento (residência paroquial) ba *Centro São Francisco de Assis* no fahe ba parte rua: atendimento ne'ebé la exige pároco nia presença iha Biblioteca paróquia nian, no atendimento hussi pároco iha *Cartório Paroquial*. Ami mós tau horário atendimento ne'ebé sarani sira hotu hatene no respeita.

Declarações e Certidões

Dala ruma sarani sira hussu declarações maibé lora-lora iha pedidos barak mak atu halo certidões batismo, casamento no óbito. Iha problema ida ne'ebé sussar atu hadi'a mak corrupção iha cartórios paroquiais. Ami sei rai nafatin documentos falsos barak ne'ebé hassai iha cartórios balu diocese tolu ninian, inclui paróquia Laleia.

Iha tinan 2002, ita-nia matabeen suli ho ksolok bainhira haree hassae bandeira RDTL ba dala-uluk nu'udar nação independente. Maibé iha momento ne'ebá kedas, inan-aman hatene katak ho liberdade mós mai responsabilidade no uluknanain responsabilidade atu harii instituição pública sira ne'ebé atu serve povo Timor-Leste nia necessidade no desenvolvimento. Hussi instituição hirak ne'e ida mak *Serviço de Registos e Notariado*, ne'ebé responsável iha Timor-Leste ba emissão documentos, no integra tiha iha Ministério Justiça nian. Ba ida-ne'e, Kreda Católica pronto nafatin atu tulun Estado no sarani sira tanba Kreda de'it mak iha arquivo organizado ba assentos de baptismo, casamento no óbito. Tuir loloos, ida-ne'e la'ós Kreda nia prioridade, tanba Kreda nia preocupação boot liu mak evangelização maibé, tanba ida-ne'e Estado no povo nia necessidade, mak Kreda mós haka'as an atu tau iha cartório paroquial sira ema ruma atu hassai certidões. La'ós tanba ossan, maibé tanba povo no Estado nia necessidade! Iha paróquia balun, sarani hein, dala ruma to'o fulan ida; iha paróquia Laleia, amu-pároco iha karik, sarani sira hein minuto ruma no lori kedas documento. Oras ne'e daudaun, maski ha'u iha rai Portugal, ha'u halo nafatin sarani-sira nia documentos iha lora rua ka tolu nia laran no haruka liu hussi internet atu *imprime* no entrega ba sarani-sira.

Maibé ita koko karik halo avaliação badak ba serviço ida-ne'e, ita sei to'o iha conclusão katak ema barak, maski ema católico, no tanba razão oioin, usa nafatin documentos ne'ebé sala ka falso. Molok atu hakat ba razão ba ida-ne'e, hussik ha'u hateten kedas no claro katak, halo ka usa documentos ne'ebé falso, hussi ponto de vista moral ida-ne'e sala, no hussi ponto de vista lei civil ninian ida-ne'e crime ne'ebé iha código direito civil concretiza nu'udar *crime de falsificação de documentos*. Então tansá mak mossu nafatin documentos ne'ebé la tuir lia loos?

- 1) Iha documento balu ne'ebé sala tanba hakerek sala iha livro de assentos:
 - i) Iha situação balu tanba hirak ne'ebé hakerek iha livro de assentos la rona didi'ak ema ne'ebé tau naran (*ida-ne'e mossu uitoan de'it tuir ami-nia experiência*).

- ii) Iha situação barak mak ema ne'ebé tau naran la hanoin didi'ak oan sira nia naran no la hatene oan sira nia data moris (*maioria*).
- 2) Iha documento balun ne'ebé sala tanba ema halo falso hodi troca naran ka data:
 - i) Tanba uluk inan-aman balu tau naran iha escola ne'ebé la hanessan ida-ne'ebé sira fó iha loron Baptismo (haluha tiha ona), ikus mai diploma no certidão de baptismo la hanessan;
 - ii) Tanba precisa “hamenos idade” atu bele tama iha escola ka administração pública;
 - iii) Atu bele hetan ossan idosos, veteranos, nst (*crime de apropriação indevida de fundos públicos*).

Ita hateke ba kotuk karik, ba tinan sanulu-ressin-lima ne'e nu'udar nação independente, ita haree katak ema barak mak contribui ba situação ilegalidade kona-ba documentos iha Timor laran tomak. Kona-ba Estado, Estado mak hatene; kona-ba Kreda, Maromak halo ita atu sai no moris nu'udar Nía ilas ida, la'ós atu moris iha bossok nia laran. Iha encontro amo-pároco sira nian ho autoridade balun, ne'ebé hala'ó iha Baucau, ami hotu reconhece katak ema ne'ebé halo ka usa documentos ne'ebé sala, usa tanba ladún iha consciência kona-ba implicação moral no criminal ne'ebé iha, ne'e duni ami la koho ke'e hodi haree ba kotuk, maibé ami sei matan moris neon na'in ohin ba oin no serviço hamutuk ho autoridades tanba Estado RDTL respeita Kreda no amo-lulik sira, maibé Justiça labele haree ba sé sé mak sala, se agricultor ida ka ministro ka amo-lulik. Então ita sei halo oinsá?

1. Bainhira ita precisa hafoun certidão ne'ebé uluk ita halo falso, ida falso di'ak liu naklees tiha labele usa tan; halo foun no moos! Aproveita mós atu confessa sala ida-ne'e iha Sacramento Confessa.
2. Bainhira “risca” karik iha livro, amu-pároco sira tem que tau nota hodi dehan katak *assento de baptismo original alterado sem autorização eclesiástica* ka nota seluk.
3. Bainhira ita la halo falso maibé assento mak sala karik, então ita tem que haree kle'an atu garante katak ema ne'e nia naran, nomos aman-inan, avós paternos no avós maternos sira-nia naran loos hotu. Labele mai ho «urgente tanba ha'u-nia oan atu ba rai liur», tanba lia loos mak urgente!
4. Paróquia-sira sei serviço hamutuk ho *Serviço de Registos e Notariado, Embaixada Portuguesa, Ministério da Educação, Comissão de Veteranos*, no instituição sira seluk, sempre que instituição sira ne'e ida iha dúvidas karik kona-ba ema ida nia documentos no precisa declaração ruma.
5. Amu-pároco sira iha Diocese de Baucau pronto atu ko'alia no explica buat sira ne'e hotu ba sarani sira atu resolve problema tuir lia loos.

Importante tebetebes ema hotu-hotu hola consciência kona-ba ida-ne'e no contribui ho lia loos ba rai doben Timor-Leste nia desenvolvimento.

Certidão de Batismo

Certidão de Batismo mak documento ne'ebé ami bele hassai hodi baseia ba *Assentos de Batismo*. Iha ne'e mak hetan documentos falsos barak. Ex catequistas, ne'ebé uluk mak responsáveis atu halo certidões, usa tinta corretora (Tipp-Ex) hodi muda buat oioin iha assentos hanessan ema nia naran no data moris. Além de comete crime, sira estraga livros assentos ne'ebé documento histórico paróquia nian. Nu'udar pároco, ha'u rassik mak halo certidões, dala barak to'o kalan boot, no la iha ema seluk ne'ebé bele acesso ba livros de assentos. Além de verifica didi'ak ema nia naran, data sarani no data moris, ha'u buka verifica aman, inan, avós paternos, avós maternos no aman-inan sarani sira nia naran loos.

Certidão de Casamento

Certidão de Casamento mak documento ne'ebé ami bele hassai hodi baseia ba *Assentos de Casamento*. Desde 2015, ami bele halo certidão de casamento ba sira ne'ebé kaben iha Laleia ka iha Cairui hafoin 1945.

Certidão de Óbito

Certidão de Óbito mak documento ne'ebé ami bele hassai hodi baseia ba *Assentos de Óbito*. Maibé dala barak ema mate no família la iha hanoin atu hussu ba *Cartório Paroquial* atu lavra (hakerek) óbito iha livro de assentos. Ita hatene katak tuir toman ema Timor-Leste nian, bainhira ema ruma mate, família

halibur atu han hamutuk. Balu reza bessik matebian nia issin mate, balu joga carta, balu oho karau, maibé maski ami taka informação iha *quadro de avisos* no fó hanoin beibeik kona-ba necessidade ida-ne'e, ema quase nunca hanoin atu lori ba *Cartório Paroquial* surat ho maluk matebian nia naran atu hakerek iha livro de assentos. Bainhira la hakerek iha livro de assentos, ami labele fó certidão tanba certidão baseia ba buat ne'ebé hakerek iha livro de assentos.

Dala ida feto faluk ida mate. Nia ema kiak tebes no ami missionário sira mak dala barak lori hahán no roupa ba nia. Nia oan-sira nunca hanoin nia. Bainhira nia mate, maski ha'u rassik celebra nia funeral, família la lori formulário ki'ik ho informação ba cartório paroquial. Hafoin fulan ruma, nia oan mane ida mossu atu hussu *guia de óbito* atu "foti ferik nia ossan". Nia nunca hanoin atu fó han ba nia inan rassik, mós la hanoin atu trata documentos iha tempo loos maibé bainhira *horun ossan* mak mossu. Buat sira hanessan ne'e mossu beibeik.

Iha paróquia Laleia ami entrega ba zeladora-sira formulário simples ida atu família bele completa maibé, maski ida-ne'e, maioria la entrega nafatin. Ne'e duni bainhira sira mai hussu *certidão de óbito*, hirak ne'ebé uluk haruka informação hetan, hirak ne'ebé la haruka informação, la bele hetan.

Assentos Batismo no Casamento hussi Livro Manututo nian

Iha tinan 2015, hetan tiha autorização hussi Chancelaria Diocese Baucau nian (17/03/2015), ami serviço iha semana ruma nia laran iha *Cartório Paróquia Manututo nian* atu hassai foto ba *Assentos de Batismo* hussi tinan 1945 to'o 1947 no *Assentos de Casamento* hussi tinan 1945 to'o 2005, ne'ebé uluk hakerek iha livro de Assentos Manututo nian no kahur ho Lacló no seluk-seluk tan. Tan ne'e mak iha tinan 2005, bainhira Laleia sai Paróquia, momento ne'ebá sira la bele entrega livro.

Ho serviço ida-ne'e, sarani sira ne'ebé kaben iha Laleia lalika ona fakar ossan no tempo hodi desloca ba Manututo atu hassai *certidão de casamento* maibé bele ona hassai certidão iha Cartório Paróquia Laleia nian. Só hirak ne'ebé kaben iha ai-laran entre 1975 no 1978 mak dala barak tem que ba foti duni iha Manututo tanba hakerek iha livro 1982/84 Manututo ninian.

Digitalização de Documentos

Iha tinan ikus sira ne'e ami remata tiha ona serviço digitalização documentos ne'ebé pároco da-uluk hahú. Além de livros de *Assento de Batismo*, ami mós remata digitalização livros de *Assento de Casamento* no *Óbito*. Ida-ne'e iha vantagem importante balu: a) bainhira livros antigos aat ona karik, sei bele usa nafatin cópia digital; b) ahi han *Cartório Paroquial* karik, cópia digital sei rai nafatin iha *Cloud* hodi proteje informação sarani sira nian; c) pároco bele acesso ba cópia digital documentos originais nian iha Laleia, Baucau, Portugal – hanessan halo agora daudaun – ka fatin hotu-hotu hodi usa de'it computador ho internet. Nune'e, Laleia mak Paróquia da-uluk atu remata serviço ida-ne'e ne'ebé Diocese hussu ba paróquia tomak. Bainhira paróquia sira seluk mós remata serviço ida-ne'e, paróquia hotu-hotu sei haruka cópia ida ba *Chancelaria Diocese Baucau nian* atu *Padre Chanceler*, precisa karik, bele compara documentos no sai apoio iha luta hassoru corrupção. Iha tinan 2015 ha'u colabora ho *Cúria Diocesana* hodi fó formação ba ema ne'ebé serviço iha *cartórios paroquiais* hodi hanorin oinsá atu halo digitalização no organiza ficheiros (files) maibé to'o agora Laleia de'it mak remata ona serviço importante ida-ne'e.

Base de Dados

Iha tinan 2012, ho belun *Pedro Cardoso* – hussi rai Portugal – nia tulun, ami hahú prepara *base de dados* ba Diocese Baucau tomak (Software de Gestão Documental da Diocese de Baucau). Maibé, nu'udar projeto-piloto, ami decide atu implementa uluk iha Laleia. Hotu tiha mak sei hahú implementa iha paróquia tomak Diocese Baucau nian.

Base de dados ne'e iha sistema de pesquisa ne'ebé permite hetan kedas ema ida nia *assento de baptismo* (la precisa loke livro original) ka buka ema ida liu hussi aman ka inan nia naran ka liu hussi ema nia data moris. Hetan tiha no haree katak buat hotu loos, bele imprime (*print*) kedas atu pároco bele assina. Processo pesquisa no impressão dala ruma la to'o minuto ida.

Maibé, atu hatama *dados*, ne'e processo ne'ebé han tempo barak, ne'e duni, iha fulan junho 2016, paróquia contrato *Leonarda da Costa* atu colabora iha serviço ida-ne'e. Nia serviço iha fulan 13 nia laran. Hafoin, ha'u rassik mak continua serviço ida-ne'e, maski atu hussik ona paróquia, no sei continua serviço ida-ne'e, hodi sarani sira nia di'ak, hodi verifica no corrige registo ida-idak. Bainhira pronto, no buat hotu loos karik, sarani sira sei bele ba iha *Cartório Paroquial* no hetan sira-nia *Certidão de Baptismo* iha minuto ida ka rua nia laran. Hein katak sei bele remata serviço ida-ne'e to'o tinan 2018 nia rohan. Bainhira *base de dados* paróquia Laleia nian pronto, equipa ida hussi diocese mak sei fó formação ba ema ne'ebé serviço iha cartório paroquial paróquia sira seluk Diocese nian.

CONCLUSÃO

Ohin loron, paróquia Laleia sai fatin ba esperança. Bainhira ita hateke ba kotuk, maski desafios ne'ebé sempre mossu, ita bele haree ho laran agradece evolução positiva tebetebes iha paróquia nia lala'ok no iha sarani sira nia compreensão kona-ba oinsá Maromak bolu comunidade atu moris sira-nia fiar.

Ha'u la iha dúvida katak sarani barak mak hakarak duni hakle'an sira-nia sentido de pertença ba Maromak no ba Kreda. Movimento ka grupo oioin paróquia nian sei haka'as an nafatin atu hala'o sira-nia knaar no ema ida-idak sei luku liután iha espiritualidade sarani atu buat hotu ne'ebé ita celebra hamutuk bele haboot ida-idak nia laran-metin ba salvação ne'ebé mai hussu Jesus Cristo.

Ba ha'u, serve sarani paróquia Laleia, sai privilégio boot ne'ebé ha'u sei la haluha no sei agradece nafatin ba Aman Maromak. Ba sarani Laleia, Samalai no Cairui, ha'u hussu perdão tanba ha'u-nia fragilidades nu'udar pároco, hussu imi-nia oração, no promete atu reza nafatin hodi hussu Na'i Feto Rosário Laleia nia harohan da'et ba sarani ida-idak.

Imi-nia atan iha Cristo,

Frei Hermano Filipe, OFMCap.